

梅花字字香

玉山

附校 譌 續校
補校 璞 稿







梅 花 字 香

附校 續校 補校

郭 豫 亨 撰

編主五雲王

編初成集書叢

種一他其及香字字花梅

中華民國二十五年六月初版

發行人

王雲五
上海河南路

印刷所

商務印書館
上海河南路

發行所

商務印書館
上海及各埠

翁

欽定四庫全書提要

梅花字字香

臣等謹案梅花字字香前集一卷。後集一卷。元郭豫亨撰。豫亨自號梅巖野人。里籍未詳。據其自序。則至大辛亥作。其書名蓋取宋晏殊詞唱得紅梅字字香句也。離騷徧擷香艸。獨不及梅。六代及唐。漸有賦詠。而偶然寄意。視之亦與諸花等。自北宋林逋諸人。遞相矜重。暗香疏影。半樹橫枝之句。作者始別立品題。南宋以來。遂以詠梅爲詩家一大公案。江湖詩人。無論愛梅與否。無不借梅以自重。凡別號及齋館之名。多帶梅字。以求附於雅人。黃大輿至輯詩餘爲梅苑十卷。方回作瀛奎律髓。凡詠物俱入著題類。而梅花則自立一類。此唱彼和。沓雜不休。名則耐冷之交。實類附炎之局矣。豫亨在至大中。距南宋之末未遠。故亦染山人之積習。前後二集。詠梅七律至二百首。與張洽之數相等。然洽詩層見疊出。總不出幽香高格。耽寂避喧之意。描摹窠臼。未免厭觀。豫亨則集句爲之。又闢新境。且屬對頗能工巧。亦勝李驥翦綃集之多集絕句。一花一石。時逢佳勝。存備詩家之小品。固亦無不可矣。乾隆五十一年五月恭校上。

總纂官 臣紀昀 臣陸錫熊 臣孫士毅

總校 官 臣陸費墀

自序

余愛梅花。自號梅巖野人。凡見古今詩人梅花傑作。必隨手鈔錄而歌詠之。積以歲月。遂成巨編。熟之既久。若有所得。暇日輒集其句。得百篇。目爲字字香。其間句煥意鍊。璧合珠聯。亦有天然之巧者。吾不知其爲古作也。一日有客過我。曰。聞君梅花詩甚佳。願倩一觀。因出是編。披閱未竟。稱奇賞羨。嗟歎久之。復掩卷笑之曰。君此詩妙則妙矣。但未免有家雞鴻鶩之誚。君旣用功如此。若自出己意。爲梅賦詠。又豈止百篇而已。且無此議。余曰。不然。古人不作詩。無知者千載之千吟。魂茫茫。一旦表而出之。見吾此作。如見古人。豈不逾於掩人之善。矜己之能者乎。客又曰。昔誠齋先生序陳晞顏梅詩。有言梅亦有妖。晞顏此詩。非晞顏語也。梅之妖。憑晞顏而語也。誠如此。則君之詩亦非君語也。梅之妖。憑君而語也。所謂梅亦有妖。信乎否乎。余矍然曰。平生與梅同一冷澹。越歷冰雪。笑傲山水。詠春風。醉明月。心清香妙。氣合神交。不知梅妖我耶。我妖梅耶。客語塞。撫掌大笑。於是呼僮抱琴。攜客引鶴。掃餘雪。洗巨觥。開樽於梅邊。盡醉而去。至大辛亥臘八日序。

梅花字字香前集

元 郭豫亨撰

詩爲吟梅字字香。騷人闌筆費平章。近來行輩無和靖。誰道花中有孟嘗。冰玉精神霜雪操。珍珠樓閣水晶鄉。東君見借陽和力。合有春風到艸堂。

圓悟、盧鉞、高菊磻、白玉蟾、翁元廣、誠齋、康節、戴石屏。

左手支頤引白雲。梅邊日日課新吟。孤高直是難諧俗。虛白本來生自心。應厭壽陽多俗態。何如宋璟獨知音。要知妙境尋詩處。花有清香月有陰。

嚴樵溪、李炎子、潘庭堅、竹溪、楊飛卿、曹晟、徐榮、東坡。

萬紫千紅不當春。花中誰解識清真。一生知歷幾多雪。百劫修來貞潔身。曉檻競成香世界。夜窗添起月精神。家僮不識春深淺。細捻香鬚數玉塵。

傅澤、陳復古、艾性夫、潘昉、晁無咎、石敏若、曹晟、于湖。

竹外疏花一兩枝。裁雲翦月作冰肌。天憐絕豔世無匹。人樂新英賞未遲。大節可欺青女凍。清交偏辱此君知。何時更約孤山去。小款梅花細說詩。

鄭碩、嚴少魯、晦庵、宋貫之、竹溪、竹塘、陳鏡湖、劉頤庵。

冰玉丰姿不可雙。百花唯有此花強。不禁夜雨輕欺著。卻怕春風漏洩香。藥訝粉綃裁太碎。蒂圍紅蠟巧能裝。此詩更欲煩君改。語妙何妨石作腸。

白玉蟾、石屏、和靖、介甫、東坡、陳后山。

風滿虛廊月滿庭。疏枝小萼自然春。故應此景難描畫。只有君詩當寫真。疑是隔牆窺宋玉。不輕吹笛付伶倫。雪中莫問調羹事。且作花間共醉人。

方北山、楊适、覺範、于湖、徐師川、楊時可、王沂公、元微之。

木落霜清畫角哀。國香和雨入蒼苔。祇今已是丈夫行。歲晚誰爲靜女媒。花事又催春色老。人生難得笑顏開。酒濃正覺春醒困。翠羽嘈嘈喚夢回。

永叔、東坡、唐子西、牛山、徐榮、劉斗溪、趙光道、孤山。

獨對梅花賦此情。冥搜欲與海爭深。十年世事三更夢。斜日欄干萬古心。絕色殊無脂粉態。高標不畏雪霜侵。詩成卻爲花拈出。堪與時人作笑林。

徐秋巖、半山、蕭可軒、唐柏山、李義山、鄭獬、放翁、柯柏山。

水沉爲骨玉爲肌。好處曾臨阿母池。雪後園林應有恨。籬邊屋角立多時。蚤開卻被嬌紅妒。未落先愁玉笛吹。要識此花奇絕處。滿窗唯有月明知。

李堯夫、毛澤民、和靖、後村、盧元贊、曹松、簡齋、白廷玉。

照水無塵骨。蛻仙幽姿高韻獨。翛然春回積雪層。冰裏人倚閒庭小檻前。一萼故應先臘破。孤標何意鏡暄妍。山窗獨坐無來客。更把前題改數聯。

王公煒、田亘、放翁、劉斗溪、無咎、楊之奇、黃榮仲、鄭碩。

徒作佳人淡竚妝。尙如逸士氣昂藏。人間臘月未曾到。昨夜花神有底忙。疏影暗香誰領略。冰肌玉骨自清涼。一枝帶雪牆頭出。陌上須慚傅粉郎。

朱淑真、趙虛齋、陳元老、紫巖、胡象坡、古詞、謝無逸、韋莊。

鐵作枝柯玉作英。世間無物鬪輕盈。橫空老樹雪無迹。滿地落花春薄情。越女從來天下白。伯夷元是聖之清。芳心暗惱憑誰訴。鐵石心腸宋廣平。

李雲仲、王性之、趙仲達、吳朽、竹溪、王梅窗、竹坡。

老杜騎驢入草庵。酒旗斜拂墮吟鞍。凡花不得沾餘馥。老眼相看在歲寒。城角日高春寂寂。欄干風冷雪漫漫。詩中還有驚人語。同向樽前笑裏看。

謝無逸、和靖、竹塘、紫巖、田元邁、應鳳山、王若虛、胡安國。

刻玉雕瓊作小葩。溼雲暗淡雪橫斜。半開半落緣誰事。和影和香屬我家。數抹晚霞憐野笛。一泓流水度寒沙。吟邊苦思無佳句。立盡斜陽數過鴉。

趙福元、程月溪、竹塘、和靖、程梅窗、徐榮、應鳳山。

羅綺吹香白晝明。仙肌不怕若寒侵。嵐陰春物未全到。夜久雪花如許深。邂逅欲成雙白鬢。懽遊聊慰十年心。一枝淡貯書窗下。不用衣篝炷水沉。

毛牧達、東坡、晦庵、趙可、半山、高公振、朱淑真、誠齋。

黯淡江天雪欲飛。屋檐斜入一枝低。禽翻竹葉霜初下。春在花梢日未西。晚歲風霜從冷淡。小園煙景正淒迷。平生慣是思梅苦。多謝詩翁爲品題。

陸倉、和靖、趙天樂、黃師雄、子蒼、和靖、張介卿、趙愚軒。

老覺山林意味長。醉吟且放老夫狂。清樽素瑟宜先賞。紫蝶黃蜂敢更忙。洗盡韶華對寒水。祇栽雲縷想仙妝。一時傾倒春風意。花氣薰人笑語香。

蕭冰厓、石屏、孫明復、誠齋、約齋、半山、簡齋、少游。

獨跨蒼虬下太清。翹空仙袂許飛瓊。從教臘雪埋藏得。盡是冰霜醞釀成。茗椀香鑪重問訊。竹枝烏帽稱閒行。寫真妙絕橫斜影。矮矮虛窗受月明。

王中立、周汲齋、介甫、竹塘、南豐、陸倉、竹溪。

雪徑清寒蝶未知。幽香寂寞動冰肌。家爲逆旅相逢處。人倚欄干欲暮時。暎水全無些子豔。背巖唯有兩三枝。勸君莫把離騷讀。細讀西湖處士詩。

黎錞、山谷、放翁、呂居仁、翟善、李涉、李碩、竹溪。

一兩點花春到梅。蟾精雪魄孕靈菱。幻成五出無多巧。自是羣芳不敢開。芳信已催詩興動。清香知是故人來。相看喜有青田鶴。露溼晨煙啄翠苔。

道謙、永叔、劉炎午闕

左緯、山谷、弧山、王南雲。

忽忽窮愁泥殺人。年年行樂不辜春。看來天下無多白。不受人間半點塵。姑射真人冰作體。秦家公子粉爲身。一鉤新月涵雲影。露蘂煙梢畫不真。

菊圃、醉翁、竹溪、張澤民、石曼卿、鄭獬、趙仲連、賈島。

天寒落日淡孤村。占斷風情向小園。翠羽啼花追昔夢。縞衣和雨立黃昏。薜厓直上雙飛屣。茅店驚寒半掩門。憶得去年風雪裏。江南石上對靈樽。

東坡、和靖、陳起、陳竹泉、方惟深、放翁、程梅窗、山谷。

裝點山林處士家。孤標粲粲壓羣葩。日融西子妝樓曉。風動姮娥寶髻斜。嵐氣欲飛山隔岸。生香不斷樹交花。有人問我生涯事。爲說吟詩兩鬢華。

曾宗目、石屏、徐柏山、城山、胡宿、石曼卿、東坡、和靖。

崢嶸冰雪老年光。的皪冰梢出短牆。池水倒流疏影動。寒枝搖落暗香藏。休嫌茉莉非吾配。羞殺梨花不解香。數點疏花人未見。倚欄偷舞白霓裳。

楊廷秀、李欽叔、和靖、童耕叟、紫巖、晁詠之、嚴粲、山谷。

玉樹分明照夕流。何人把酒慰深幽。如焚古鼎龍涎餅。疑是佳人狐白裘。誰與維摩伴禪寂。還如何遜在揚州。他年我若修花史。要放梅花出一頭。

周弼、東坡、玉蟾、潘邠老、林季謙、子美、江奎、劉仙倫。

輕寒瘦損十分肥。徹骨清香蘸水枝。摘索又開三兩朵。蕭疏別是一般奇。動搖臘信隨征使。裁翦春風入小詩。春意自知無主惜。從教橫笛月中吹。

東坡、陸倉、簡齋、元遺山、崔魯、無逸。

酒醒閒行小徑深。梅邊春意恰相迎。偏憐雪裏無雙豔。此是花中第一清。寒影似傳東野貌。前身想奪素娥精。人間絕品無人識。莫怪離騷不著名。

戚秋澗、介甫、陶開祖、竹溪、梅屋、曹晟、和靖、吳枋。

肯把孤心受雪降。天寒猶著薄羅裳。人生有酒須當醉。世上無花敢鬪香。幸不折來傷歲暮。直須留此占年芳。寒香嚼得成詩句。勾引詩人費品量。

紫巖、東坡、菊圃、華岳、子美、半山、秋崖、石屏。

絕豔原非著粉團。不隨凡卉競凋殘。定知深院黃昏後。多在青松白石間。嵐翠溼衣雲葉曉。雪花當戶戟枝寒。傍人問我詩成未。字字推敲不用刪。

誠齋、虞祖南、無逸、姚合、王初、劉禹錫、潘湖隱、鏡湖。

寒雀枝頭眼擘椒。尋芳因得過溪橋。一生知己林和靖。晚歲論交何水曹。暮雨自歸山悄悄。行人相對馬蕭蕭。從來愛物多成癖。獨有梅花記得牢。

張彥臣、永叔、環溪、翁元廣、李商隱、介甫、李涉、徐止山。

任是霜凌不變心。風饕雪虐長精神。吟詩寄興蒼茫外。冷蕊疏香寂寞濱。自是孤根非煖地。獨殊羣豔占先春。三郎見此應傷感。膚雪參差見太真。

李清臣、呂居仁、柯棄民、趙伯成、吳融、康節、介甫、吳枋。

陣陣寒香壓麝臍。紛紛絳蝶莫教知。移來春晚二三月。問訊江南第一枝。玉笛淒涼吹易徹。土瓶純素貯偏宜。晴窗畫出橫斜影。坐看庭花日影移。

林和靖、鄭碩、陸蒼、張槩、半山、曹晟、簡齋、萊公。

依然相見故山傍。老眼驚看意自傷。幸與松筠相近歲。不隨桃李鬪新妝。同心不見昭儀種。入骨濃薰賈女香。獨鶴一聲山屋冷。倚闌人政爲詩忙。

舒亶、林季謙、樂天、黃巖老、簡齋、山谷、雪磯、冰厓。

天下有花無此清。小窗收拾作新吟。清香雅韻十分足。冷蕊疏枝半不禁。併遣春風催好句。且教明月伴孤斟。此時此景真奇絕。立盡欄干到夜深。

簡齋、竹溪、花谷、子美、放翁、東坡、徐愚溪、何宜齋。

踏破溪邊一徑苔。與尋陳迹久徘徊。雲漫隴樹魂應斷。風靜寒塘花正開。只恐好枝爲雪壓。留看瘦影上窗來。花前獨立無人會。漫使詩腸日九迴。

石屏、呂居仁、秦韜玉、劉滄、石屏、易涉趣、趙嘏、元廣。

竹裏人家竹外溪。竹間璀璨出斜枝。誰知金重紅肥處。正是花飛玉碎時。春事未容桃李覺。真香寧許蝶蜂知。自除和靖無知己。見說梅花不要詩。

曾崆山、東坡、曹晟、杜東、石屏、趙義若、吳枋、菊圃。

儘受羣花北面降。清如冰雪更無雙。普陀真相來凡世。止渴將軍擁碧幢。春意收香歸鼎實。月窗憐影掩書缸。吟朋聚首須行樂。且倒花前白玉缸。

東坡、南豐、醉翁、菊圃、後村、鄭性之、劉公明、介甫。

一枝春近故山長。百草千花莫比芳。憑仗幽人收艾納。不須長笛奏伊涼。月娥服御無非素。苟令鱸羹更換香。直看過年開未了。爲花痛飲百千觴。

林季謙、山谷、東坡、東坡、文潛、李義山、石屏、后村。

雪後相看意更深。漫將一朵插銅瓶。人生此樂須天賦。歲晚知心唯月明。白鶴未歸春已老。危闌倚徧酒初醒。逋仙只說香和影。不是詩家莫浪評。

道潛、張逢吉、東坡、陳玉溪、雪磯、耐庵、柯柏軒、劉炎午。

愛月軒窗半不糊。幽香淡淡影疏疏。曾迷玉洞華光老。祇愛孤山處士廬。世事只如花代謝。春愁全仗酒消除。無人細說吟邊事。笑撚山花望太虛。

會嶼山、晦庵、胡宿、竹溪、誠齋、秋崖、邵棠、陳搏。

花滿南軒翠竹低。人間俗眼不曾窺。淡煙疏雨靜相對。明月清風兩自知。尚有瘦香供玉笛。未教落素混冰池。咸平處士風流遠。我亦兒嬉作小詩。

張復文、王禹玉、程滄洲、和靖、弧山、無咎、徐无競、東坡。

茅舍疏籬月色新。冷搖疏朶欲無春。天香國豔肯相顧。玉潔冰清不受塵。心向雪中偏暴白。開從霜後越精神。老來花事無消息。嬾性如今成野人。

北山、和靖、晦庵、湯東澗、潘枋、紫巖、于湖、寶鞏。

道骨雖清不畏寒。道裝宜作玉人冠。生無桃李春風面。好作梨花夜月看。碩果寂寥生意寓。玉肌蕭瑟粉香殘。溼雲不渡溪橋冷。鐵笛一聲人倚闌。

介甫、山谷、誠齋、王敏夫、童俊民、無逸、古詞、盧鉞。

酥滴寒英露滴香。花爲句子葉爲章。眼前開落人心別。雪裏幾多風味長。尚有閒襟尋水石。欲知春色到池塘。從今桃李皆門士。彈壓芳菲入醉鄉。

季績、誠齋、鄭性之、石屏、半山、山谷、玉蟾、朱淑真。

冷葉吹香幾度春。孤懷寂寞與誰論。夢思洛浦嬋娟態。占斷孤山水月村。只恐素英欺白髮。且圖清影伴黃昏。碧欄干外春風軟。手搭花梢記月痕。

韓雲溪、葛采、楊飛卿、菊圃、于湖、余樵隱、葉水竹、李碧山。

洗盡鉛華見雪肌。清香異質世稱奇。向從逋老題詩句。又是東坡覓句時。雪後園林纔半樹。水邊風月笑橫枝。人間萬事花開落。春到春歸漫不知。

東坡、方維深、維南、壺山、和靖、山谷、張澗泉、張守一。

勾引春情出院牆。無人知處忽然香。愁連粉豔飄歌席。亦要天花作道場。風約暗香臨淺水。月明疏影媚寒塘。浣花溪上堪惆悵。可是無心賦海棠。

楊蟠、玉蟾、李義山、羅隱、朱淑真、無逸、鄭谷、介甫。

不見梅花鄙客生。芳時同此賦林垌。不妨明月重相憶。只有春風喚得醒。富貴不來頭已白。江山有分眼終青。吟翁縱賞歸來晚。酒盡沙頭雙玉瓶。

劉炎午、半山、秋崖、吳菊潭、誠齋、玉蟾、徐敏中、子美。

只嚙清香飽殺儂。不愁調鼎子無功。檀心已作龍須吐。妝面回看粉黛空。幾處酒旗山影下。一川風物笛聲中。但吟清淺橫斜句。千載詩人立下風。

后村、呂申公、東坡、方惟深、和靖、司空圖、竹塘、鄭子元。

脈脈悠悠倚檻清。孤根何事在柴荆。素衣莫起風塵歎。檀暈妝成雪月明。失路漸知前計錯。尋芳更待幾時行。只今賸作驚人句。盡把梅花巧琢成。

夏旻、和靖、放翁、東坡、鄭谷、左緯、后山、王伯大。

梅花字字香後集

兩葉三花露短牆。久留金勒爲迴腸。東君有意能相顧。百卉含羞不敢芳。特地留爲滕六伴。入簾偷學壽陽妝。何當共嚼西巖雪。吐出新詩字字香。

曹晟、李義山、朱淑真、劉溪翁、竹溪、陶然、弧山、劉翰。

僮鶴俱隨處士仙。天荒地冷幾經年。轉灣有竹無人處。淡月微雲動水邊。大士定中蒙素衲。謝娥行處落金鈿。客來擬說吟邊事。驚見梅花第二篇。

盧文峯、壺山、淮海、后村、韋莊、邵棠、王敏夫。

霽色翻成一段奇。小窗新月正相宜。花開花謝長如此。春去春來可得知。少待微酸著青子。要將真色鬪生枝。老人終歲閉門坐。始見清香無盡時。

陳子高、蘊常、羅袞、平甫女、陳從古、東坡、隱巒、楊繪。

山北雲衣破萼紅。開時先合占春風。可憐蜂蝶飄零後。屹立冰霜冷淡中。野廟向江春寂寂。荒城吹角雨濛濛。偷閒把酒簪花去。已作高年白髮翁。

鄭性之、李九齡、半山、圓覺、李羣玉、潘梅泉、趙信庵、徐榮。

殘雪斜陽獨步時。行行僮鶴靜相隨。故人坐隔月千里。驛使不來春一枝。亂插繁花向晴昊。碎按冷蘂賦

新詩。傍人不識予心樂。自有溪風山月知。

宜齋、王愛菊、山谷、林季謙、少游、張槩、伊川、元日能。

壽質清癯獨傲霜。一身盡著雪衣裳。未愁瘴霧重肌雪。先得春風半面妝。天下從來無定色。人間一味有真香。夜窗只恐勞清夢。自折瓊枝置枕傍。

巽齋、黃巖老、林季謙、石曼卿、永叔、舒亶、花谷、後村。

貌枯神澤骨槎牙。蕭索東風兩鬢華。甘與雪霜同冷淡。醉看參月半橫斜。溪山冷落泥三尺。水竹參差屋數家。自笑自吟還自得。案頭搖落小瓶花。

弧山、東坡、劉斗溪、東坡、呂居仁、張逢吉、盧槩、方夔瀑。

杖藜行盡幾崔嵬。嫺藥商量細細開。白雪卻嫌春色晚。好風吹送暗香來。孤標不入千花伴。潔已應無半點埃。爲愛君詩被花惱。立殘西日共徘徊。

鄭性之、子美、昌黎、雪溪、東陸、童耕隱、東坡、江奎。

春風元是未曾知。一兩點春供老枝。酒債尋常行處有。花開只恐看來遲。和羹宰相調金鼎。天上瓊兒傳玉肌。吟罷香銷鑪篆冷。月團新碾淪花蕊。

晁補之、蕭東之、子美、鄴、羅、後村、元日能、竹溪、少游。

榑柸鑪寒硯欲冰。舍南舍北雪猶存。旋催妝額天宮樣。靜愛寒香撲酒樽。兩岸嚴風吹玉樹。一灣流水護

柴門閒中有意堪圖畫。溪上無人月一痕。

竹溪、疏寮、于湖、羅隱、章莊、葉水竹、黃文度、吳可。

憑欄小立撚吟髭。歲晚知君德不孤。月下精神宜淡竚。雨中嬌韻越清癯。高唐神女蘭供澤。姑射仙人雪作膚。雪壓小橋人迹斷。莫將歌舞浣西湖。

真西山、翁士特、于湖、趙福元、吳可、和靖、危復之、趙璧。

淡淡梅花不要妝。世間顏色比應難。任渠凡卉爭春豔。白計貞心老歲寒。破鼻試從風處觸。無人肯向月中看。羣芳且莫相矜笑。但守平生一點酸。

誠齋、胡安國、徐榮、石曼卿、誠齋、裴璘、李堯夫、秋崖。

自向深冬看豔陽。肯因冷淡怨年芳。向來桃李渾無味。莫把荼糜亂比香。月冷素娥偏有態。夜深青女溼微妝。無人描畫無人詠。分付梅花自主張。

韓偓、後村、和靖、楊飛卿、晁詠之、古詞、羅北谷、陳藏一。

殘雪猶封宿草荄。羅浮峯下小徘徊。花開花落春無恙。年去年來老漸催。女堞未須翻角調。騷人徑欲築詩臺。望塵俗眼那知此。誤作唐昌碎月猜。

無咎、孤山、汪秋潭、元遺山、張安彥、介庵、花谷、無咎。

拆補新詩擬獻酬。身閒心遠地常幽。寒烏三匝月當戶。長笛一聲人倚樓。風本不期吹客夢。花應羞上老

人頭遲遲欲去猶回首。繞著羣芳看不休。

後山、東坡、後山、趙嘏、荆公、東坡、司空曙、和靖。

花骨經寒瘦不支。霜溪咽絕照冰姿。願教青帝常爲主。只恐朝雲有去時。幽興每隨流水遠。暗香誰遣好風吹。老來尙費閒精力。夜滴花梢露寫詩。

趙信庵、朱喬年、朱淑真、方維深、介甫、黎錞、弧山、王中可。

凍蕾含香蠟點勻。塞梢氣象自清真。人憐紅豔多應俗。天與孤標不受塵。臥波千嶂雪。小橋流水一家春。小窗無語靜相對。時有暗香來襲人。

趙伯成、子蒼、和靖、于湖、程梅窗、陳從古、太白。

瘦倚疏篁半出牆。雪前雪後想淒涼。率先羣槁破新臘。倚賴春風壓衆芳。埋玉地中成故物。論花天下更無香。生來不喜同桃李。故作無情淡淡妝。

饒德操、玉蟾、孫志舉、誠齋、陸倉、文潛、韓雲溪、無逸。

春在枝頭已十分。十分吟思十分清。肯隨騷菊同奴僕。卻說山礬是弟兄。曉檻放開花意思。夜窗時見影斜橫。悠悠此意知誰會。一笛晚風山雨晴。

王建、李炎子、黃與齋、吳枋、石敏若、錦江、竹溪、李正臣。

綽約冰姿絕可憐。垂髫相識到華顛。自非水月觀音樣。一見風標姑射仙。墮砌尙疑妝後粉。賦詩我獨愧

前賢年時花下春風夢。醉擁笙歌總少年。

崔德符、曹南湖、朱淑真、紫巖、周端臣、山谷、秋巖、陳藏一。

落木回飄動屋山。譙樓霜裏角聲乾。楚人元未知真色。范叔不應如此寒。暗吐幽香穿別院。起圓清夢倚欄干。江邊一樹垂垂發。借與行舟作雪看。

介甫、徐顯之、晦庵、王知之、田元邈、應居玉、子美、施端甫。

石磴橫斜壓樹根。江南家住水雲村。愛他清思不成寐。誰信幽香是返魂。一鏡寒泉浸明月。數枝香雪照黃昏。主人正在梅深處。花襯蒼苔半掩門。

李億、汪秋潭、宋自遜、東坡、趙山泉、黃玉泉、白珽、趙仲璉。

玉女精神不尙妝。晚風孤影弄霓裳。也知造物有深意。而況笛聲堪斷腸。雅有風情勝桃李。自緣紅紫怯冰霜。東君若要分流品。列作人間第一香。

文潛、淑真、東坡、玉蟾、璉不器、曹晟、种放、江奎。

自負孤高鐵石心。吟魂未減昔年清。更無俗物當人眼。惟有春風不世情。瘦影看來天愛畫。香葩況是雪儲精。詩人已化羅浮鶴。見說梅花恨不平。

徐榮、王留畊、樂天、羅鄴、王公煒、晦庵、朱復之、鄭頌。

霰雪霏霏作凍天。杖藜行盡幾山巔。已成白髮潘常侍。自棄明時孟浩然。水墨畫圖春澹澹。黃昏霜月冷

娟娟知君要見梅花賦。一片心腸鐵石堅。

溫公紫巖、半山、斗溪、秋崖、劉炎、午和靖、葛元白。

吟懷長恨負芳時。我爲梅花屢賦詩。卻恐錯穿桃李徑。尙餘孤瘦雪霜姿。疏枝似被金刀翦。玉頰何勞獮髓醫。不爲調羹應結子。等閒開落只春知。

和靖、林季謙、玉蟾、東坡、後村、東坡、半山、張榘。

閒步蒼苔意味長。穿林傍水幾平章。冷將雙眼窺春破。始見檀心吐露芳。宿蘂煖含風浩蕩。落花愁對月昏黃。白雲留得清閒住。受用此花無限香。

陶然、石屏、紫巖、歐彥成、半山、華岳、謝疊山、楊巽齋。

庭樹霜飛木葉枯。天教飛雪伴清臞。湘妃危立凍蛟背。青女寒生金粟膚。寄我誰能如陸凱。羣賢還許訪林逋。直須分付丹青手。畫我憑欄覓句圖。

丁謂、劉子翬、蕭東之、林季謙、花谷、錦江、方元英、簡齋。

溪上春濃花正開。直疑冰玉作根荄。絕憐綠萼攬春去。曾與將軍止渴來。素豔已應搖雪屋。錦囊今喜助詩材。斷橋深處無人見。三嗅清香當一盃。

鮑當、翁虛一、紫巖、羅鄴、宋庠、張安彥、鄭清之、石屏。

此詩真似此花清。擁褐空齋得細吟。胸次盡空桃李氣。歲寒非避雪霜侵。小瓶雪水無多子。明月家山一

寸心獨凭欄。干意難寫。一聲橫笛暮雲深。

竹溪、王器之、湯漢、張詠、嚴少魯、李敬所、崔魯、王程山。

一樹玲瓏玉刻成。雪消風煖不生塵。已呼白面書生去。未怕青腰玉女噴。標致清高吟不足。冰紈生澀畫難親。去年人到今年老。老醉花間能幾人。

王建、張籍、田元邈、半山、竹塘、介甫、岑參、劉禹錫。

我憐貞白重寒芳。一簇輕鈿繞淡黃。自入冬來多是煖。不如伊處爲無香。幽姿羞損嬋娟女。粉面端疑騎省郎。把酒花間弄明月。重來杖履且徜徉。

陸龜蒙、韓子倉、石屏、後村、朱淑真、田元邈、疊山、汪起莘。

高唱離騷伴寂寥。貌攏心苦氣飄飄。曾教入夜月添白。疑是經春雪未消。苦節雪中迷漢使。玉門關外老班超。東風不管前溪水。一路吹香過石橋。

后村、南豐、古詞、戎昱、陸倉、武元衡、張仲澤、姜白石。

半屋蒼雲冷不知。茅檐竹隔兩幽奇。疑情金谷登樓日。依約華清出浴時。隴月定知今夕恨。春風搖動故人思。綠楊解語應相笑。雪裏開花恐是遲。

沈适、晁用叔、趙義若、梅亭、方惟深、梅窗、臧謀、東坡。

天與寒梅作媚柔。春風回怨雪霜羞。小詩試擬孟東野。好句都輸趙倚樓。真態生香誰畫得。冰肌玉骨不

禁愁。雕鑄肝腎。竟何益。朝夕催人自白頭。

湯溪。東坡、東坡、王仲元、東坡、潘邠老、晦庵、子美。

一在梢頭。一在窗。半疑殘月半疑霜。卻憐羣卉無剛節。不媚東風祇淡妝。塵世要知身是客。花前惟以醉爲鄉。宿醒未醒。閒欹枕。人與花心各自香。

紫巖、南豐、陳朝老、汪起莘、蕭可軒、江奎、朱淑真。

清淺溪邊淡粉容。柔情繁白玉鈿封。來尋谷口子真隱。去弔孤山和靖翁。前驛迢迢波渺渺。疏煙淡淡樹重重。凭欄多少傷心事。盡在疏枝冷蘂中。

王性之、石曼卿、竹溪、倪月峯、王建、劉改之、童耕隱、和靖。

續續題詩不奈閒。戲搜綺語續花間。香隨靜婉歌塵起。花帶攏仙辟穀顏。慣作野人多野興。夢隨孤鶴到孤山。吟成不敢高聲讀。應有青藜夜扣關。

後山、後村、溫庭筠、紫巖、半山、宜齋、許東軒。

瀟灑春葩縞壽陽。玉容歲歲涉風霜。調羹莫作兒童語。結子非貪鼎鼐嘗。自有松篁爲伴侶。看渠桃李敢承當。風高日淡疏林靜。細朵斜枝惱意香。

石屏、胡象坡、紫巖、半山、古詞、誠齋、張嶠、謝無逸。

深院藏春春不知。悠悠短笛倚風吹。高人遺迹空佳句。老子今年嬾賦詩。雲破月來花弄影。人稀景靜雪

消除。敲冰自換瓷瓶水。幾點飛香入硯池。

曹晟、李鎮、介甫、陸倉、張子野、鄭谷、弧山、何稷。

清姿元不受鉛華。坐掩柴扉綠竹斜。萬木尊爲諸老行。數枝妝點野人家。絕憐夜氣渾如水。占斷春光
此花。詩欠推敲吟未穩。閒敲石火煮新茶。

趙福元、曾布、弧山、石屏、玉蟾、向敏中、耐庵、曾漢英。

玉樹交橫雪後天。今年春色勝常年。月穿書幌漏清影。風弄花香作瑞煙。錦袖妒姬爭巧笑。練裙溪女鬪
清妍。自吟自酌無些事。始信人間有散仙。

司馬公、崔度、竹溪、朱淑真、李山甫、東坡、徐愚溪、劉雲卿。

乞與雲膏洗俗腸。和詩端恐不成章。斬新一朵含風露。薰作九天沉水香。人事自生今日意。幽花還似昔
年芳。兩山盡是經行處。山後山前兩履霜。

程伯淳、林季謙、東坡、玉蟾、後山、王粹、秋崖、石屏。

忍凍尋香雪裏行。壓枝冰雪眼中春。年年歲歲花相似。冷冷疏疏藥更勻。豈有林泉邀俗客。更將風月醉
佳賓。會須載酒孤山去。疏影橫斜訪舊鄰。

孫志峯、子蒼、劉希夷、從古、倪天隱、永叔、竹溪、子蒼。

孤宦殊方意自違。故山幽夢憶疏籬。千里路家何遠。十二朱欄月未移。春色似人看又老。流年如水去

難追。詩家只恐和羹晚。綠葉成陰子滿枝。

張橫、陸蒼、竹溪、徐千里、方緯、陳堯佐、趙伯成、杜牧。

滿地飄零更斷腸。恐隨春夢去飛揚。柳搖臺榭東風軟。花撲玉缸春酒香。驛使不來羌管歇。燕釵初試漢宮妝。巡檐說盡心期事。幾度凭闌到夕陽。

林季謙、介甫、周調、岑、張、檠、韓、偓、晦、庵、王叔安、于湖。

不受燕脂半點侵。不堪細雨溼黃昏。風吹雪壓轉強項。月淡霜清欲斷魂。方士斲成金鼎汞。素衣同扣酒家門。一年春事又成夢。愁紫愁紅滿故園。

沈蒙齋、東坡、秋崖、放翁、陶然、竹塘、沈惟肖、斯庵。

湖山搖落歲方悲。自恐冰容不入時。但笑紅芳誇豔冶。渾將絳雪點寒枝。橋邊野水通漁路。城外春風吹酒旗。正似美人初醉著。淡妝濃抹總相宜。

陳竹泉、東坡、秋崖、王梅溪、和靖、劉禹錫、介甫、東坡。

梅花字字香校譌

彙得五硯樓袁氏鈔本。末題是書遵王所藏元刻本進內府矣。世少傳本。鈔胥譌字。異日正之。云云。余核其前後兩集。止詩百首。提要則云二百首。因疑其未全也。客秋。託書友張仲聲鶴舉。從文瀾閣手鈔一冊。歲暮寄來。今春擬將詩中所集之句。一一覆按原詩。不意粵氛擾及鎮揚。吳郡。時驚風鶴。第就二本互勘。百首之數相同。殆提要傳刻之譌也。詩句及人姓名異同處。間爲標記。姑俟後日再行細訂。咸豐三年六月。仁和胡珽識。

自序一頁五行之千誤原 六行巳字誤

前集四頁一行若字誤 七行盡韻袁本

六頁十行羅閣本 十三行曉閣本

七頁七行絳字誤

八頁十五行玉袁本

九頁七行搖閣本 九行瀾閣本 十五行季袁本

十頁六行維南誤原 七行淺水閣本 十一行終閣本 十一行縱閣本 十五行方惟深據本頁大

十一頁二行巧琢閣本

後集十四頁三行身閣本 四行只閣本 八行溪袁本 十二行是字誤原作自 十四行鄴羅鄴原 十五行天

誤原
作添

十五頁六行原白字誤

十六頁四行滴閣本 六行塞字誤 六行臥閣本 九行雪前誤原

十七頁五行知居之袁 六行原枝字誤 十五行已字誤

十八頁三行李閣本

十九頁十行路閣本

二十頁二行溪字誤 四行香閣本

梅花字字香續校

會稽鏡吾氏董金鑑輯

自序一頁八行越疑作閱

前集二頁九行牛山當作半山

七頁九行陸著前一頁亦作著未知孰是

十頁二行招當從自作招苦洽切

後集十四頁一行傍當從伊川集作時原詩上聯已云傍花隨柳似不應覆

十五頁十四行無咎當作

十九頁八行倉當作著

二十二頁五行案本詩花撰玉缸句唐岑參詩也此注岑下疑脫一參字但下文張槩至于湖尚五人似又參差不合當逐句考正

附補校

提要一頁八行張洽梅花詩未詳案四庫全書總集類三載梅花百餘首今惟瀛奎律髓僅存數首云本倡和詩也又宋端平中有張道洽者作梅花詩三百餘首今惟瀛奎律髓僅存數首云

張道洽與張洽未知是否一人當再考

前集二頁一行兩字誤原作兩



玉 山 璞 稿

顧 瑛 撰

本館據讀畫齋叢
書本排印初編各
叢書僅有此本

玉山璞稿

至正甲午

春暮有懷琦龍門兼呈于匡廬袁子英春草池綠波亭上作。

綠波亭上風光好。水荇菖蒲叢雜生。出林柳花作團去。放子鯉魚成隊行。美人不見有新夢。春事欲歸生遠情。明當與君洗大白。濁酒百壺相對傾。

董孟起參政領水軍副都萬戶開水軍府事。二月廿三日。以瑛佐治軍務。留海上。索詩。口占奉呈。燕領將軍虎豹顏。去年殺賊下三關。筆端草檄千鈞力。馬上開弓一石彎。定賞名標丹鳳辰。論功身在紫薇班。今看耀武回滄海。日日從軍奏樂還。

張仲舉待制以京中海上口號十絕附郊九成見寄瑛以吳下時事復韻荅之。

估販年來不受沽。徒勞蹤跡走通衢。祇緣盡要新交鈔。除卻天都到處無。帶號新軍識未真。攔街作隊動生嗔。官支爛鈔難行使。強買鹽糧更打人。白晝驚風海上號。水軍三萬盡乘濤。書生不解參軍事。也向船頭著戰袍。官鼓鼙鼙報二更。船頭風浪盡軍聲。不知海若緣何事。一夜顛狂直到明。冉冉長蛇漢水東。噓成黑霧滿虛空。腥風怪雨重陰底。化作黃峰不是龍。

莫辯黃鍾瓦缶聲。且攜斗酒聽春鶯。河西金鱗新翻譜。漢語夷音唱滿城。
紅綠油牌去復來。長身碧眼更頽頽。口傳催辦軍需事。一日能無一百迴。
築得吳城易得摧。年年風雨繞蘇臺。農家盡患時行病。總爲修城染帶來。
紅纓白帽錦鞍韉。鐵甲金戈刺繡鞭。義士一千屯海上。自家供米又供錢。
和糴糧船去若飛。兼春帶夏未曾歸。用錢贈米該加七。納戶身懸百結衣。

官糴糧。美山東趙公伯堅也。公以江西行省檢校官來浙右。糴米十萬石賑饑。至是吳民苦於官糴。公一無所擾。而官亦不勞而集。瑛雖不才。敢傲白居易體作是謠。使吳民歌以餞其行云。

官糴糧。官糴糧。東吳之民日遑遑。去年今年來侍郎。凜凜六月生秋霜。官錢未給先取將。今朝十萬上官倉。明朝十萬就船裝。小斛較斛大斛量。吏弊百出那可當。輸錢索物要酒漿。磨牙吮血如虎狼。滿身鞭箠成瘡瘡。郡侯視之泗滂滂。忍使吾民罹厥殃。實欲止之無計張。官糴糧。官糴糧。東吳之民無積藏。山東趙公來南昌。南昌殺賊如犬羊。賊雖解圍民亦荒。貧者守死富食糠。愛民誰如趙平章。手發官帑錢百囊。公既得之夜乘航。緣江逋賊肆獍狷。操舟帕首來取攘。我公挽弓一石強。百發百中賊始亡。倍道十日抵蘇杭。誓不移文下官坊。微服民間身作商。指廩發粟酬其償。十萬月就民不傷。千艘萬斛如龍驤。黃旗赤幟分兩綱。南風開船若雁行。船頭擊鼓聲鏗鏘。六月牽江過鄱陽。新米未熟舊米香。江西之民無枯腸。官糴糧。官糴糧。粒粒盡是民脂肪。天子端居白玉堂。相君峩峩坐廟廊。紫衣朱服列兩廂。天門九重啓煌煌。豹

蹲虎踞嚴其防。覆盆不照日月光。誰能奏額奏帝旁。以公糴糧爲典常。東吳之民始安康。官糴糧。官糴糧。東搬西載道路長。去年押糧上蘄黃。今年五月未還鄉。安得風塵靜四方。羊腸蜀道成康莊。舟車所至皆來王。普天之民樂而昌。天子聖壽垂無疆。萬年千載不用官糴糧。

三月廿三日侍董大參巡海早發路漕

檄下遲明發。樓船似馬來。海空初日出。風急大旗開。武士森前列。儒生忝後陪。茲遊絕奇壯。直欲到蓬萊。是夜回宿海口舟中董參命賦口號

夜半分弓哨海頭。千艘耀武發貔貅。旌旗影拂三沙曉。砲石聲懸萬島秋。六帥移文驅巨鱗。諸軍擊楫誓中流。回頭坐見辰星近。十日糧船達帝州。

題琴川趙實甫恭甫瑞蓮圖

繁荆樹下盆池好。一朵芙蓉並蒂芳。露井月涼棲翡翠。天機雲煖織鴛鴦。埴籥迭奏高堂樂。鶯燕雙開半面妝。喚取桃根與桃葉。蹋歌聯臂醉稱觴。

題深山蕭寺圖

潭潭古寺山中央。迺是梁朝之道場。九霄臺殿起突兀。萬間金碧開熒燿。塔鈴風前作人語。天花靜裏生空香。青溪布□□可到。逕上翠微尋竹房。

題宋徽廟畫設色仙山樓觀圖

宣和□子昔神遊。鳳駕行空過玉樓。此去有人言赤馬。□來無路逐青牛。分明長嶽通玄圃。想像方壺接十洲。□把仙山作圖畫。瓊花琪樹不勝秋。

題龍門草堂圖。就柬王仲立。

龍門上人如已公。茅屋賦詩清興同。不知白衣者誰子。無乃玉山之老翁。長松飛花落輕粉。曲澗截山橫。斷虹。聞道城中王給事。近日讀書居灑東。

倪元鎮畫梧竹圖。附章心遠玄士見寄琦龍門。爲題長詩于上。瑛□韻以識。

山人自愛山中宅。繞屋長溪深百尺。桐花委地曉風清。竹筍過牆新雨碧。東海倪迂真絕俗。牛角漢書鉏。且讀。茅齋時有已公吟。□□□陳蕃宿。思之不見勞紳交。月□□夜深溪潮。晝圓忽□□案。碧梧翠竹如其漂。生產□□金有幾。門與□峯相對峙。我才獨小不成邦。作詩或借嵇康擬。龍門一別垂十年。客中又見秋□顛。滿懷契闊欲陶寫。好寄錫山龍縫泉。

題秋江釣隱圖

我愛長江上。蕭蕭八月秋。斷山當柁尾。落葉下船頭。風起青蘋渚。沙分白鷺洲。釣竿如可得。添我一羊裘。

次琦龍門過傀儡湖詩韻

秋波無煙淨且空。畫槳搖盪雙漁童。晴沙翠竹見湖曲。落日青山如剡中。鷗鳥翻迴蓮葉浦。菱歌忽起蘆花風。何時磯頭聽春雨。茶竈筆牀稱老翁。

送金文中常熟州吏滿陞庸司奏差

言偃祠前落木秋。擔簦負笈上行舟。盡言能吏瓜期滿。又喜英才水部收。青草岸頭啼布穀。黃梅雨裏叫鉤輈。農家際此愁如織。奉直承顏說得不。

題桶底圖

不數仙家狡獪功。戲將桶底搯蟾宮。豈知大地山河影。已在庖犧一畫中。

題曲江宮殿圖

千門宮殿鬱嵯峨。輦佳人翠畫蛾。江水江花流不盡。斷腸元在馬嵬坡。

題仙山便面

仙山矗矗下韓東。半入青雲半入空。記得玉笙鸞背上。相看都在月明中。

寫山居圖後

我愛山居人。青山在窗牖。朝耕隴上田。暮飲牀頭酒。門無索租吏。座有擔簦友。不知茲山中。著得我儂否。

琦龍門與王仲立遊玉峯惠聚寺龍門作排律一首以紀。寫寄草堂。索瑛次韻。

瞰厓古殿當澄江。中有古佛疎眉厖。山靈運石馴虎伏。老禪咒水神龍降。冷冷露下杪羅葉。寂寂香團瓔珞幢。竹筍出牆雲結戶。桃花夾岸石爲缸。鼉鼉隱見蟠千礎。金碧參差絢八窗。我昔馬垂紅錦障。君今船繫綠楊椿。風清齋鼓三時報。月落晨鐘半夜撞。露布未聞郵驛過。霜鞞猶聽戍樓撻。淳于夢裏空爲國。曹

鄮詩中不是邦。歸去支硎亭子上。開籠自放鶴雙雙。

題徐公憲挾彈小像

絳縠裁春服。行騎白面馮。手中金彈子。切勿打慈雅。

寫龍門草堂圖

留客茅堂下。聯詩石鼎邊。呼童拾松子。同煮白雲泉。

家翁命題任月山五馬圖

月山人畫唐馬。筆力豈在吳興下。此圖五馬更能妙。乃爲玉山居士寫。居士平生好奇古。投老讀書深閉戶。客來展卷閱權奇。颯颯秋風吹馬語。我聞大唐天寶中。朝廷不用凌煙功。中使傳宣下五宅。一朝並入連昌宮。望仙樓下花開早。妃子霞觴對花倒。五家沈醉夜歸來。夫人虢國爭馳道。南官牽過月明中。汗溝流血耳生風。當時圖寫落人世。至今粉墨傳遺蹤。君不見唐太宗。坐下六馬皆真龍。昭陵舊刻照落日。千秋萬歲垂無窮。

鏡歌十章并小序送董參政

至正十有二年。狂賊梗化。紅帕首者。動數十萬。所在蠶起。廣平董公。參政江浙行省。由淮西率兵復杭城。平諸屬邑。戰昱嶺。殲羣醜。十四年春。詔開水軍都府於婁上。公領帥事。平海寇也。是年夏。復詔判樞密院。將大用矣。海隅鯁生。敢擬鼓吹鏡歌十曲。謹書隆茂宗。描曹弗興所畫黃帝兵符圖後。以寓頌美。

之萬一云。

克淮西言光蔡賊犯淮西。公率兵轉戰所向克捷。繼召班師復杭城。并屬邑也。第一。
克淮西法。羸越陣堂堂。火烈烈。介士奮。逋賊滅。杭城屹。長江撤。將用良兵。用捷。趙用牧。東胡子。漢用廣。匈奴懾。有永斯世垂勳業。

入昌化言既定杭城。復入昌化。殄羣寇。遂參中書也。第二。

入昌化羣蠻降。旗整整。鼓逢逢。凱歌還。民樂康。走馬報入中書堂。

克復於潛賊衆懼罪。我師尙未集。公徠許自新。賊猶豫持兩端。公乘怠卷甲疾趨。梟賊降衆也。第三。
克復於潛推爾鈴。爾發爾機協爾占。短兵旣接奇兵連。擊其怠兮渠魁殲。武功烈烈民物恬。緊立爾祠正義僉。樂茲土。永永年。

定安吉賊據千秋關襲我軍。公令憑險投石發矢。賊莫能支。追數十里。俘馘而還。遂定安吉也。第四。
定安吉揚威靈。市肆不易民不驚。戢艱難。致太平。致太平。屺嶷未數燕然銘。

攻昱嶺賊敗濶徽饒。復集衆攻昱嶺。公法八陣圖。爲長陣亘百里。遂殲羣賊也。第五。

攻昱嶺。鑿三關。何物小子肆凶奸。公赫斯怒。八陣頒。天衝地軸居兩閒。白刃霜積。火旗朱殷。十有八戰殲羣蠻。龍章來。虎旅班。憑關號呼。毋以我公還。我公其還。四海永無患。

水軍開殄海寇也。海寇公肆暴。焚城邑。絕糧道。帝命開水軍府。公領帥事。三踰月而功成。海宇又寧。

也第六。

帝命開大府軍興若雲雷。鵝鸛激中流。蛟蜃潛海隈。萬弩洪濤平。金戈白日回。國儲數萬艘。飛越龍之堆。洋洋大東海。下視不盈杯。成功兩期月。內詔從天來。行人毋遮留。要見皇業恢。君王壽萬歲。我公位三台。

巡大洋言公開府率水軍耀武海洋濤風迅發千艘竝舉鯨鯢逃不十日抵京師也第七。

巡大洋略搏桑雷矢發。火旗張。列缺駛翼海若藏。萬夫虎虓千艘驤。不十日達帝京。聖皇悅。惟汝功。爾德爾輔靖四方。

驅海獠海寇既平遣黨襲暴民罷市公發令驅諸海外民情迺悅祠以祀公也第八。

驅海獠奠吳民羣獠肆暴吏不敢噴公怒赫令必申獠惴惴民忻忻請罪乞自新公威以武撫之仁吳民尸祝報德無有垠。

海之平賊匿海島肆劫掠。壓水軍擒之。沈其舟。尸諸市門。海以寧也第九。

海之平海以寧挾長戈批奔鯨鱗角摧毒霧腥膏烏鹵波不驚我公開府功告成挽海水洗甲兵。趣入朝。貳樞府將大用也第十。

趣入朝四牡駢駢赤烏几几帝曰俞安汝止錫汝斧鉞用輔我皇子公拜稽首受帝之祉我土我民爾安爾救粵千萬年載諸史。

題鄭白鶴喬林遠山壁傲李協律體

鯀公脚踏紅鯉魚。鐵網截海鉤珊瑚。風海底起煙霧。濃綠斜飛隔塞素。影木花開九月秋。亂葉撇波如雨流。六鼇拚足三山舞。白鶴夜向西池語。

金華方道存鍊師。以張彥輔所畫雲松圖索題。就和卷中張仲舉詩韻。

金華有羽士。嚶道茲山中。據松拂朱絲。晒雲飛玉龍。手招皇仙人。排空下琳宮。白羊忽起立。萬壑生靈風。新秋夜坐有感。

蘋末微風起。虛庭夜氣清。河傾天際落。星近斗邊明。坐久新涼發。愁深百感生。豆花紅絡緯。相對放秋聲。錢思復汎舟過玉山。作詩見示。次韻以復。兼呈于匡山。

聞道書船盪槳行。過湖詩思十分清。幽人素有煙霞癖。之子寧無丘壑情。七月君王猶北幸。長淮丞相又南征。書生此日頭應白。無奈秋風策策鳴。

次琦龍門夜宿陳性之學舍詩韻。東寄陳性之訓導。時學中殿梁生紫芝故及。

廣文學舍清如水。故友相過氣味真。翠幕燈花寒作蕊。晝梁芝草淨無塵。清晨館下招諸子。長夜山中夢老親。我亦儒冠竟何補。願於東海作迂民。

寄題王孟德春雪軒

聞君帶雨種琅玕。只好稀稀數十竿。西寺故人同散逸。北堂阿母喜平安。春風細細開籬入。暗雪紛紛落座寒。他日錦衣多稚子。當軒下馬爲君看。

和幹克莊崇明三沙詩

三沙宛在海當中。隱見珊瑚樹色紅。神島由來連弱水。樓船欲去引剛風。東方日出樵人國。半夜潮生織女宮。卻憶題詩繡衣使。高秋曾過玉山東。

和幹克莊題崇明官舍詩

海上開官署。龍光夜獨明。居民雜吳楚。風俗異幽并。琪樹戎戎見。雲颿箇箇輕。飛塵如不到。亦欲去逃名。

和幹克莊題壽安寺詩

別島壓東溟。沙黃草樹青。金仙開紺闕。玉女降殊庭。龍鉢波心獻。蛟機雨外聽。乘槎從此去。爲結候潮亭。

和程小山春遊卽事

小隊行春簇錦鞍。海風習習射眸酸。雲閒僧寺鍾魚蒼。雪後漁舟網罟寒。曉挹東瀛窺若木。夜瞻北極望長安。使君觀海難爲水。從此襟懷萬頃寬。

和程小山畱題壽安寺詩

公餘無事得相祥。每笑浮生有底忙。秋水魚龍歸澤國。春風花木護雲房。宵分東海安期棗。共接西池阿母觴。聞道博桑有銅柱。長繩我欲繫飛光。

右前詩五首。崇明州朱庭瑞啓明二秀才來索和。刊入郡志。

予總角時。拜中岳仙伯於舍下。今已四十年矣。思之如神遊紫府。見陶隱居。累欲從之而不可得。今

讀錢思復先生贈其子于匡山詩。不能不爲之興懷。遂次韻寓意。呈思復匡山二先生云。
幼年曾揖浮丘伯。口談玄經坐瑤席。我家老翁師事之。授以神丹光五色。憶從海上接盧敖。汗漫騎鯨遊八極。至今佩劍瘞空山。夜夜龍光射蒼壁。高風可仰不可見。傳家只有牀頭易。鳳雛學道匡山中。羽服翩跹瞳子碧。片玉峯頭長往來。每歎世情今匪昔。錢塘故人七月來。共看新月如弦直。舉杯邀月來酒中。不知松露霑衣溼。山中之樂樂無央。胡爾遑遑若行役。作詩爲蒼入山人。莫作身安車馬客。

秋興十絕呈錢思復于匡廬袁子英

廉纖小雨逗微涼。何處花風度暗香。愛殺一雙飛翡翠。竝銜秋色過漁莊。
又見涼生白苧衣。秋光全比去年非。閑身得似梁三伯。日日玉簪花上飛。
西風忽起白蘋洲。吹落芙蓉幾瓣秋。快雨過晴涼似洗。鶉鴉啼在水西頭。
絡緯專秋軋軋啼。西樓坐待月明時。梧桐樹上無多葉。莫遣涼風□意吹。
芭蕉細雨弄新寒。白髮高堂鏡裏看。無賴西風吹過鴈。背翻秋色上淮安。
自愛玉山深處居。幽懷欲與世情疎。近來交際渾多事。始信嵇康嬾作書。
颯颯涼風吹芰荷。虛庭正愛月明多。秋聲忽在闌干外。驟雨滿池鳴綠波。
玉山雲氣接蓬萊。山下軒窗隔竹開。金粟池頭衣帶水。聲聲引上轆轤來。
淒風冷雨最關情。灑向芭蕉不住聲。獨有一庭書帶草。秋來猶伴鄭康成。

溪上喬本老槎牙。上有灼灼凌霄花。碧雲四合月欲上。啼殺爭棲無數鴉。

琦龍門爲王氏孟德仲立求賦秋林讀書圖詩

龍門一別三月強。忽然扣門登草堂。盛言王家好兄弟。皎若丹丘雙鳳凰。近向山中結書屋。屋裏藏書三萬軸。門前一樹紫荊花。堂背兩墩慈孝竹。時當林麓西風起。木葉蕭蕭打窗紙。簡編舒卷對新涼。深夜篝燈日爭晷。大郎學禮可立身。小郎學詩亦有成。棹之懿之賢伯仲。元方季方難弟兄。我生素有耽書癖。忽聞此言深歎息。未得扁舟逕造門。秋林漠漠遙相憶。邇來吳中閱閔家。養子不教從豪奢。白狐之裘紫駟馬。日日春風桃李花。從此荒嬉事輕薄。盡把□□束高閣。老來對客始面牆。卻悔青春不曾學。君不□機雲學舍小如舟。兄居東頭弟西頭。一朝同起仕晉室。雲閒名字垂千秋。又不見韓家學舍京師中。當門只種青梧桐。聯翩冠蓋可相望。舉世人呼兩相公。似君之家亦希有。十載讀書不窺牖。壯年才力正崢嶸。功名肯落他人後。聖元天子崇文儒。明年竝馬趨皇都。大字雙懸龍虎榜。爲君題作登瀛圖。

題龍門觀泉小像

龍門一罅通青天。傾厓束峽天梯連。白雲萬疊吹不斷。上護一脈清冷泉。泉飛如龍出山去。石梁倒挂銀河懸。下方臺殿起突兀。撞鐘擊鼓朝金仙。道人齋餘憩寂寞。身披袈裟袒右肩。面厓趺坐入水觀。大千一息秋毫顛。天風泠泠響天樂。舉頭忽散青松煙。何人畫法追龍眠。塗朱點綠分清妍。貌得空山定光相。摩尼下照驪龍淵。我今焚香三稽首。盥手摹勒青瑤鐫。嗟予鬢髮久颯然。未能解脫塵世愆。道人肯爲一懺

悔盡滌諸垢。生青蓮。著我同坐盤石邊。更論莊生秋水篇。

送陳希文秀才北上

西風鞍馬古長洲。送子攜才事遠遊。山割岷峨分地脈。水排淮泗合江流。方今丞相南征日。似昔周公北伐秋。聖主築臺延國士。虎頭食肉定封侯。

自題繆叔民惠所畫讀書巢

自向江頭採白茅。山中結得讀書巢。柳裁已發窺春眼。竹水初分帶雨梢。怕水流花斜入壑。小橋憑岸直通郊。未知何日從吾嬾。且對青山誦解嘲。

和倪雲林所寄

十月清霜天始涼。家家砧聲夜擣裳。開書乃審近候好。問客兼知道味長。我尙笑談浮大白。君能服食事。中黃。何當相過一相見。帶取奚奴攜錦囊。

丞相出師口號

丞相出師秋九月。十月冬後到新州。南來驛騎雨捎尾。北去糧船風打頭。軍聲如雷震淮泗。殺氣上天干斗牛。早提觸體見明主。四海一日同歌謳。

次琦龍門所寄二詩兼柬王氏兄弟

石橋北去路猶賒。竹裏開門是酒家。密密疎疎雲外屋。紅紅白白寺前花。登山著屐思靈運。落帽當風憶

孟嘉記得天池同勝賞。歸來日腳已西斜。
龍門壁立何巉巖。海日照耀金爛斑。爾言秋後山更好。我獨老來身未閑。將攜綠玉杖九節。去借白雲屋半間。爲約王家兩兄弟。日日賦詩相往還。

和復翟文中知事

潯陽三世昔曾聞。況汝才如五色雲。去歲械詩承問訊。何時尊酒對論文。京畿玉帛連綱入。江嶼旌旗小隊分。筆硯書生供冗役。每搔華髮倍思君。

繆叔正郎中以漕事馳傳。歷浙東諸郡。渡大羣小羣二灘。作渡灘歌見寄。次韻復之。
朝上灘。暮下灘。客行一日一日難。饑蛟掉尾鱗捲齒。奔流百折何時已。上灘萬篙進纔咫。下灘回頭條千里。南八粵。東八甌。灘流灘流去莫收。使官乘檝過中流。船頭把觥船尾謳。岸上村村似寒食。店舍無煙人菜色。賊圍解去米如珠。況復雨多傷二麥。但願班師奏凱歌。四海同日休干戈。野無烽塵。水無風波。大羣小羣將如之何。

三二年來。商旅難行。畏途多棘。政以爲歎。徐君憲以雪景盤車圖求題。觀其風雪載道。不能無感然也。遂爲之賦云。

山盤盤。車逐逐。大車前行後車促。不愁雪裏衣裳單。但恐雪深車折軸。行人歲暮心忉忉。天寒馬疲牛腹枵。日落不知行路遙。今年月尾度敖鄙。明年月頭過成臯。二月三月臨帝郊。似聞物低米價高。莫使終歲

徒勞勞。城中貴客朱門豪。狐裘繡襪紅錦袍。琵琶合曲聲嘈嘈。氈房肉陣傳羊羔。雪花迴風如席飄。捲簾醉臉殷若桃。豈知人閒衣食如牛毛。

題徐公懋楸樹下放鶴小像

丰姿濯濯三春柳。文采飄飄五色雲。未許仙家借騏驎。楸欄樹下候靈君。

題劉德方經歷西村圖次察士安御史韻

門前石子路三叉。正是西村第一家。牆缺遠山青入屋。簷坳細柳綠藏雅。坐臨流水堪垂釣。行入幽畦學種瓜。我亦桃源隱居者。何時對雨翦燈花。

琦龍門邀王仲立品茶有詩見寄云踏雨過山來喫茶瑛甚愛此句次韻以復

雞籠峯下爾東家。破曉寫詩邀品茶。秋風過樹落紅葉。夜雨滿溪流白沙。浮缸蠟蜋酒百斛。插架牙籤書五車。嗟予有約不得去。赤日畏途塵土遮。

陳叔方寫竹一枝于春雪軒壁閒龍門賦詩于左瑛次韻寫寄

結軒正合背雞峯。種竹哦詩也自工。月夜滿林疑朔雪。秋聲入戶是春風。題名聊紀一時興。寫影當推八法功。若許扁舟經相過。爲君摘阮醉其中。

寓居東郭風雨中辱王仲立叔正自山中○奚奴寄詩○韻二首以復且招之過溪上時龍門同

在東郭

我愛君家好兄弟。森森玉樹倚瓊林。揮毫對寫閒居賦。促膝同歌梁甫吟。牽牛蔓竹莖莖發。薜荔懸松箇箇陰。問得書軒何處是。雞籠峯下澗之潯。

我愛君家好兄弟。同處讀書秋樹林。僕子囊書遠將至。道人把詩欣共吟。十月清霜未爲冷。一日乍晴猶作陰。幾時扁舟過婁上。須到狀元溪水潯。

學圃亭詩爲蕭元泰真人賦

學圃丈人蕭神翁。黃冠羽服山澤容。曾候青牛瞻紫氣。佩劍隱入東蒙峯。南尋玉書探禹穴。鞭霆叱電騎蒼龍。紫皇一日授瓊簡。命主海上蓬萊宮。蓬萊宮中春日好。碧桃滿地春風掃。呼龍白晝耕紫煙。種得玉芝與瑤草。五月五日手自收。七月七日仙人擣。擣成絳雪赤如丹。一服刀圭顏不老。丈人玄圃誰築亭。彩霞爲幕雲爲屏。亭中夜誦黃庭經。羣仙弭節空中聽。霓旌飄飄衛九鳳。青都寄語遙丁寧。賜以會稽外史號。錫以翠羽金流鈴。我識丈人甫十歲。示我琅函啓神祕。飽讀山中石室書。碧□丹章盡奇字。謂我身中有仙骨。晚歲相期供服事。十丹九轉今已成。我獨胡爲走塵世。地肺采芝空避秦。武陵栽桃誰與鄰。青門種瓜誠小隱。東籬對菊何其人。彼皆與世或未合。逃名潔己元非真。何如丈人手種不死藥。不知人閒甲子秋復春。君不見朱仲李園三十六。歲收李子三千斛。長安市上賣珠郎。名在龜山九光錄。

龍門與王仲立叔正同過草堂喜而賦詩

我別龍門強半月。住在婁江之水涓。客中見月動遐想。夢裏與君吟舊詩。歸來不得一餉樂。老去已成雙

鬢絲秋林弟兄有高誼。扁舟到門如有期。
是日瑛白婁江方歸。而羣公之舟同及門矣。故賦是詩也。

次琦龍門草堂清集

銀燭草堂生夜寒。深杯百罰起爲歡。翠盤行繪傳冰縷。玉手分茶試月團。故友別如三月久。梅花折寄一枝看。還山倘若疏蓮沼。好鑿龍門八節灘。

王仲立遊華藏賦詩見寄次韻以復

聞君同過玉峯西。盡日飲芳兼食菲。懷人心與暮雲合。揮絃目送征鴻飛。淮西千里鳥□□。□□□□□□□。安得風塵淨六合。馬上鏡簫丞相歸。

次琦龍門遊馬鞍山詩

馬鞍之山幽且佳。回巖疊嶺多僧家。雞鳴推窗看曉日。海色爛爛開紅霞。人言茲山出美玉。一草一木皆英華。石頭嶄巖踞猛虎。藤蔓犖确纏長蛇。我昔春遊春日斜。山僧攜酒相邀遮。仙樂雲中降窈窕。天風松下吹袈裟。嚮師石屋憩蕭灑。一籬五色薔薇花。夜吹鐵笛廣公院。聯詩石鼎烹新茶。君今好奇良可誇。躡雲著履追麋麕。詩成大字寫絕壁。山靈衛護行人嗟。歸來自駕白牛車。齊州九點元非遐。下方盜賊聚如蟻。視之不啻恆河沙。

十一月二十七日霧中作

仲冬天氣暖如春。忽作梅花思遠人。黑霧漫天吹作雨。黃沙落地散爲塵。長淮千里連烽火。西浙三年運米薪。近報大軍屯六合。義丁日日點行頻。

次西齋聽雨韻

今年臘月春未透。窗前老梅方始花。孤燈靜夜同聽雨。短夢此時應到家。佳節明朝是冬至。空江落日數年華。龍門歸去今成隱。肯寄活水來烹茶。

十一月三十日冬至

今年南至子月盡。宿霧不斂雲蒼涼。愛日自添一線影。夜電忽開千丈光。官府徵求苦到骨。村落餓莩寒無裳。近時南來持斧使。盡是各部尙書郎。今年南至子月盡。北風回暖似秋涼。誰拈綵筆書雲物。我愛瓊杯泛酒光。盤舞小垂纖玉手。蹋歌一色縷金裳。莫嗟青紫輕如芥。好屬從軍白面郎。

十二月初八日丞相自六合班師喜而有作呈秦文仲秀才

百萬王師曉渡河。江南民力已無多。饒歌鼓吹軍前奏。渾脫蒲萄馬上馱。唐室□謀歸李靖。漢廷功業數蕭何。書生亦欲觀文化。再拜天階看舞戈。

自題松下摘阮小像

山人愛著晉衣冠。手把月琴松下彈。貌得形容在丘壑。只緣才薄不勝官。

臘月廿四夜。姚子章省掾見訪。小集西□□□文仲聯句以紀。

今年臘月二十四。有客乘舸下江村。顧雪從蒨挺見三白。秦春到梅花露一痕。靚女當筵分豆粥。顧癡兒出戶看靛盆。他時相見玉山裏。秦共說尊前語笑溫。顧

用前韻和呈姚婁東

今年臘月二十四。風景頗似石壕村。斷岸雪消生草色。空江水落見冰痕。兒童共喜交年節。燈火爭燒老瓦盆。縣吏下鄉投府帖。相逢無暇說寒溫。

臘月二十六日夜。可詩齋夜集聯句。時在座者于彥成、袁子英、秦文仲、張大本、顧瑛也。

今夕迺何夕。歲律已云暮。更長燈燭明。顧夜冷冰雪互。滕六巧薦瑞。于封孃怒相妬。簪盞各盡驩。秦杯行不知數。肉臺春筍纖。袁法曲冰弦度。紅淚泣風蠟。張翠煙積香霧。鼎沸雀舌烹。顧酒瀉龍頭注。咿嚶轉鶯喉。于蹒跚蹋鵝步。燕謔落語穿。秦馳驅慨行路。計窮曾授首。袁車墜珠費履。風塵暗城郭。張稼穡罄場圃。憂傾漆室葵。顧淡分嬾殘芋。天王狩河陽。秦奸臣拒官渡。濟時風雲會。于曠世龍虎遇。前席宣室徵。袁下詔輪臺布。凱奏杖杜詩。張諫諷校獵賦。干羽舞兩階。顧歌謠誇五袴。時清仰皇澤。秦會少憶良晤。春冰破微甲。于夜月照寒素。雲閒鶴鳴陸。袁吳下書堆。顧疲衰髻似戟。短于腹如瓠。張也鄉曲英。顧秦亦廊廟具。孔問郊子官。張杜賞已公。句。啜違念契闊。秦茗芋寫情慄。冉冉歎駒馳。袁營營笑蚊聚。浮生草棲廬。于虛名日晞露。嗟彼噂沓徒。顧有此和樂孺。用繼石鼎聯。聊以寓所寓。秦

右二十八韻。是日懷陸良貴、鄒九成、琦元璞也。

題徐公憲載雪舟

山陰道上剡溪頭。夜半失卻王子猷。梅花笑人不相見。至今脩竹風颼颼。海虞徐卿隱者流。以蒲作帆桂作舟。浩歌招隱聲不絕口。迺以載雪大書標舵樓。船中何所有。圖畫在左書在右。船頭何所有。三尺鯉魚千斛酒。客至漁童擊楫歌。船尾樵青舞垂手。或時浮琴川。或時泛笠澤。不是浮家并泛宅。一朝大雪夜填門。忽憶阿□頭雪白。中夜揚舲曉到家。膝下稱觴壽羣客。一朝雪花大一圍。東郭有人御弊衣。自披鶴氅上船去。日暮與之同載歸。徐卿徐卿孝義有如此。不數迴舟深夜裏。匡廬山人作文書卷端。索我作歌書卷尾。我家玉山深且遙。山中積雪暖不消。君家丈人離山東結屋。我亦倚山西結巢。去年臘雪厚三尺。今年春雪一尺高。雪中咫尺不得會。毋乃石頭路滑難相邀。我今還君此卷增太息。我欲借此舟載雪同遊遨。

玉山璞稿

至正乙未

青玉案 彥成以他故去。作此懷之。

春寒惻惻春陰薄。整半月春蕭索。旭日朝來升屋角。樹頭幽鳥對調新語。語罷雙飛卻。紅入花腮青入
萼。盡不爽。花神約。可恨狂風空做惡。曉來一陣。晚來一陣。難道都吹落。

富春馮正卿其伯父古山父仁山結樓讀書名曰來青古山登景定壬戌進士同張濡守獨松關濡
遜公與弟驢戰死樓敞復重葺之以盡卷尾。題有脫誤

二馮讀書樓百尺富春山色開窗入文星絢爛照秋闈劍氣崢嶸動寒碧長公死節獨松關有弟驢者同
其難忠魂尙聞風雨夕馳突鐵馬撼獸環當時非無史官筆國亂倉皇書不得於乎宋季豈乏人天啓真
人開北極樓之結構五十年次公重葺其椽黃金市書增萬卷樓前大樹清陰還我與鐵崖期亦久吹
簫騎牛古城口爲君持酒問張濡問濡家有茲樓否

和鄒九成從軍詩時二月子以守關婁上

洗甲東海水飲馬西江潮大風吹旗腳軍容愈飄姚戈船踏櫓回月中橫短簫青袍富家兒髀裏肌肉消
囚俘獻六府用以報明朝

和秦文仲所寄就柬鄒九成

三月江南春事晚。西枝花木恰芬菲。燕尋舊壘歸華屋。魚趁新潮觸斷磯。我亦自憐爲客久。君應不怪寄書稀。雲臺迂史如相問。爲說羈心欲奮飛。

三月江南花事晚。港上草色春欲迷。勁弩射潮海水立。天旗翻風江日低。隊簇錦韉塞永巷。行分絳蠟照通閨。爭如歸去玉山裏。期子共躡青雲梯。

述懷

目笑閑身作散官。也隨小隊簇金鞍。江關月□□啼早。海市春深雨氣寒。殺賊有方多武備。賑饑豈意屬儒冠。思家夜夜勞清夢。幾日歸承菽水歡。

和寄洪碧海兼柬袁仲博岳季堅

見說呼龍種石田。今年瑤草勝常年。仙花秀把三危露。丹鼎香浮五色煙。洗鱖澗邊邀月飲。拋書松下看雲眠。汝陽逸史知無恙。閑看迂齋寫太玄。

代書寄岳季堅

忽驚使者下郊居。起鎮危城備擣虛。半夜海聲江截斷。一春花事雨驅除。朝騎生馬趨公府。暮閱陰符校武書。只有計籌迂博士。人來問我近何如。

徐公憲載酒來慰。寫寄于外史。

四月西郊初雨晴。飛花落絮兩冥冥。客中似我頭先白。交際如君眼最青。江水又添南浦恨。草堂自愧北

山靈徐卿載酒來相覓。見說清齋寫道經。

寫寄余方外

山陰道士紫雲裘。向荷攜樽過我遊。豈謂干戈頻在眼。更憐風雨又移舟。壚頭柳色猶牽恨。客裏萱花不解憂。見說毘陵城下水。近來匯合大江流。

水軍謠

富家阿兒美且都。紅絲繸縣金虎符。爭誇殺賊取銀盃。憫體擲還納大夫。富家阿兒如阿□。□舟出海捉颶風。七星對襟卷簷帽。賊中傳是水龍。

喜聞命相詔至喜而有作

鸞詔翩翩降帝旁。江南赤子尙荒荒。鄴城月照雌雄劍。淮甸星馳赤白囊。已見排山驅海若。更須操矢射天狼。太平有象崇文治。底用田家執戟郎。

謾成

三月江南春尙寒。花枝強半雨摧殘。通術不使新交鈔。到處都添濫設官。虎士揮戈迴落日。海神躍馬障狂瀾。畏途客裏能相見。取醉高歌拔劍看。

張景思同守西關蒙惠白鬣魚一尾忽常呂二妓見過就留夜飲口占以記

閑居每羨鹿門龐。忽爾移文守海邦。厭聽潮聲無夜雨。喜看春色帶晴江。白魚受釣供三尺。翠羽穿花見

一雙騎馬歸來佳客在。畫堂潦酒照銀缸。

和瞿惠夫卽事二首

澤國清和四月天。不堪公事重留連。受風燕子猶多語。向日葵花政取妍。使者雨中乘驛至。王師海上枕戈眠。腐儒不願黃金印。舊業猶存負郭田。時事紛紛若聚沙。自憐客裏度春華。奸雄豈是池中物。狂妄真成井底蛙。山色空江雲障斷。星芒垂野斗橫斜。寸心憂國慙無補。兩鬢飛霜一半加。

予以官守繫身七十日間。草堂松菊。積雨半荒。馬上口占一律。

我守西關七十日。朝朝騎馬入城行。草堂積雨荒松菊。水國無花少燕鶯。赤子弄兵連百里。雞人擊柝報嚴更。安能鑄劍爲農器。盡使閒田寸寸耕。

金屏曲

錦堂龜甲泥金屏。九枝蠟樹花熒熒。四星當筵夜降靈。軍裝官妓雙娉婷。歌嘯嬌鶯舞輕燕。五十朱絲瀉幽怨。璫玉深杯割花片。四月八日尊前勸。治香火炙氎氎紅。瑤罌水滴金銅龍。猿翁劍杖擊滅燭。蝴蝶交飛落寒玉。碧煙綠霧迷冶容。花魂夜出闌昌宮。舉湯醉浴雙芙蓉。牽雲曳雨留春風。墮珈遺珥鬼妻拾。向月啣白狐泣。桂旗行行去無跡。雄雞雅雅呼日出。

花允中以弓矢受知大帥。辟爲親隨。其所居曰孝思筠室。攜卷求題。爲書二絕。

花郎每憶奉親時。種竹當窗扁孝思。新筍今年密如簣。竿竿盡刻蓼莪詩。
□□□的久知名。見賊身如快鶻輕。大府遴才居上選。傾城盡說得花卿。

和許彥溫都事見寄

西郊草堂裏水上。夏木晝陰車馬喧。子爲武官乏虎相。我欲隱居無鹿門。陶令醉歸五柳宅。杜老愁□浣
花村。守關三月不得去。屋裏候賓欣有孫。

和下室之靈慈宮對景有感

又向西郊揖馬鞭。相逢不飲亦□□。登盤杏子紅於□。出水鮑魚白更鮮。夜電引雷催雨至。海潮平岸帶
江連。客懷盡日無排遣。自向雨窗類斷編。

覃維欽府掾雨中過草堂許宮樂府造語新麗作詩以贈且期攜紅牙者同至

夜雨高堂生涼。眞珠美酒灑紅光。香凝龜甲屏風上。水滴蓮花刻漏長。麗語盛傳今樂府。新詩多是晉
文□。如公案牘能閑暇。攜取張家記曲□。

無題

惜春長欲與春期。薄倖東君信有私。花粉□房蜂祝子。芹泥蒼壘燕巢兒。蜀娥恨織七成帳。吳女愁纏八
□絲。不寄回文機上□。空將五色染相思。

盛斷金鞍白鼻驕。兒家門戶鎖春華。牡丹紫拆初含蕊。豆蔻紅酣半吐花。盼女樓中飛燕子。來婆街裏卜

琵琶。雕籠鸚鵡。休饒舌。長是無人叫點茶。

黃四孃家竹過牆。日長愁斷九回腸。蘼蕪葉大思公子。宜草花開憶漫郎。鬢撲金蟬垂鬪葉。帶銜玉燕動丁當。自將團扇隨蝴蝶。要打雙飛一道香。

石城女子唱迴波。唱入迴風思轉多。腸斷紫鸞分破鏡。淚拋紅豆溼羅幃。東游洛水思甄后。西望巫山憶楚娥。五色柔情絲萬縷。夢魂長繫海棠窩。

于彥成爲山陰之行賦此以別。

端陽明日是。遺恨在懷沙。客裏非無酒。尊前不見花。受風憐舞燕。得雨哭鳴蛙。只憶山陰客。孤帆去路賒。

予逃名於吳淞江。時于彥成將歸越上。舟中有懷。

肯將身事逐飄蓬。鸞爵何緣到野翁。老去滔滔嗟逝水。愁來咄咄坐書空。一窗夜色長江裏。十里雨聲清夢中。更憶會稽于外史。行廚還在灑亭東。

舟中寄婁東諸友

憶昨西郊歎別離。扁舟便向雨中移。行窮江水一百里。臥盡風波十二時。到處好山皆可畫。近來新事不如棋。殷勤寄語婁東友。歸日草堂重賦詩。

乙未書實和孟天暉都司見寄

江頭日日惜芳時。三月春光兩鬢絲。拔劍自歌還自舞。邑人誰識虎頭癡。

治安無策濟時艱。始信金消壯士顏。怪底颶風翻漲海。浪頭一直過狼山。
獵獵東風吹火旗。水軍三萬盡精肥。一春殺賊知多少。箇箇身穿濺血衣。
婁上人家不識春。簷頭蛛網亦生塵。朱門桃李皆零落。只有東風未嫁人。
隔屋征人去不歸。朝朝思婦泣春菲。大隄芳草連天長。莫信啼鶻怨落暉。
海口潮聲挾雨來。西風一陣卻吹迴。書生此日愁如洗。斫地高歌是莫哀。
聞道君王目早參。每虛前席問江南。何人醫國如秦緩。有客能棋似李愬。
盡說樓船水戰塵。西風烈火張天高。一從赤壁爭雄後。千載功名只騎曹。
大戶今年無老米。細民近日有新錢。街衢寂寂無車馬。風景淒淒似禁煙。
梅雨今年多去年。青秧白水漫平田。端陽過了南風起。不見誰開漕運船。

送方行已往松江參臻雲谷和尚。

阿師法號號行已。百里搖船弄新水。玉山正月春始寒。不放風光到桃李。
桃李花開花未成。一月都無五日晴。忽然而來遽然別。把酒對春無限情。
無限情在何處。細雨蒼苔石頭路。張帆又向雲間行。水草青青飛白鷺。
雲間古寺金銀開。中有黃金獅子臺。老禪宴坐揮玉塵。談空說有聲如雷。
阿師今年纔二十。慧性豁開非面壁。可翁弟子數十人。眼見阿思先入室。
僧中云是支道林。況復好詩仍好琴。詩以繼風人之大雅。琴以寫古人之素心。
我欲留師十日住。師竟掉頭不迴顧。揮絃興逐孤鴻飛。囊詩腳踏春潮去。
春潮去。

暮卽還。矯首相思雲樹閒。老我相從修淨土。鑿沼種蓮歸故山。

舟泊山塘雨中口號

海賊初退山賊連。姑胥細民如倒懸。只憂疫起在五月。豈意雨多如去年。山光依微弄野靄。水色慘澹凝愁煙。城中交鈔糶官米。城外鼓聲催戾田。

乙未五月初號

二月修城五月過。修城不了柰城何。只因一夜斜風雨。到曉都坍一半多。農家祈社種良田。盡卜今年勝去年。抱布貿秧都插徧。開門一夜水連天。成隊誰家青苧娘。頭遮箬笠足如霜。入城糶米不歸去。屋裏踏車人正忙。雨中賣魚兼買冰。沿村打鼓傍鮮秤。二斤十貫新交鈔。只直倉黃米四升。堤頭放馬是何人。兩兩三三輦作羣。強把新錢買村酒。口稱曾去做苗軍。

長歌寄孟天曄都事

憶昔春風吹少年。繡衣驕馬珊瑚鞭。錦堂絲管遲落日。青樓鶯燕迷花煙。卽今未老嗟當日。坐臥使人倦行立。太平天下起干戈。從此百憂如蝟集。大兒服勤欲養親。擬卜草堂聊遠塵。前年天子賜金虎。命長千夫防海濱。百里離居將二載。我復治生給不逮。郭外薄田力作耕。原上柔桑訓奴採。二親頭白笑語溫。次兒行酒壻應門。有弟隔屋罕相見。我婦日牽齷齪孫。天子仁慈尙姑息。丞相南征興重役。乘時餓虎晝喫。

人誰與蒼生繫休戚。民力不堪供奉承。董責盡用尙書丞。新行交鈔愈澀滯。米價十千酬四升。□□□□
□子怒。一朝遠放西河去。班師下詔慰黎元。四海歌謠滿途路。今年頑民起西山。帕首舉火燒闔關。城中
六官奮六節。凱歌馬上擒俘還。是時海寇集江下。水軍殺之海爲赭。元戎不識予何人。起作區區守關者。
守關三月不得歸。豈假威權屬布衣。自謂一身本無事。又俾審理民間饑。補官使者招人粟。一紙白麻三
萬斛。頻年官糴廩爲空。數月舉家朝食粥。時維五月梅雨多。眼見青田生白波。饑餓仰天哭無食。今秋無
成將柰何。吳江漫漫風波急。夜返扁舟及家室。坐看急電怒驅雷。驟雨打窗愁欲泣。我歌長歌行路難。聞
者撫膺坐長嘆。皇天流毒虐下土。自此天下何由安。嗚呼。自此天下何由安。

陳敬初詩來問訊次韻以復

我別故人陳太丘。住在婁江之上頭。南風吹海大魚出。西日射地連山浮。守關三月騎官馬。聽雨十日對
漁舟。緬憶行春共行樂。如此好懷成夢遊。

寄題桃花溪吳浩然平遠樓

飛樓高立桃花溪。溪上碧桃花滿蹊。天邊湖水開簾入。雲外山巒到檻齊。每見神龍挾□□。者聞靈姪向
人啼。何時一舸當門繫。醉倚闌干取次題。

次韻吳東礪見貽

龍門盛說吳東礪。投老心閑能好詩。燕賓每出蕉葉餞。教子自唱柳枝詞。山光隔野蕩晴靄。水氣入林生

碧滋。我亦桃源隱居者。百里悠悠勞遠思。

次龍門韻寄杪欄室舍孤月上人。

曾向虎丘兼月住。雪滿連山萬松樹。于時始識舍上人。日日相邀勞治具。夜來有夢過僧房。茶煮劍池春水香。杪欄一樹花盡發。覺來鼻觀生清涼。今日龍門俄至此。邁我置身巖壑裏。寄問東林遠法師。著得武陵陶處士。

八月十日與龍門飲于西樓。口占一律以似。

徙倚溪樓上。西風欲暮天。亂雲依樹出。落日向江縣。驛斷南來騎。潮催北去船。相逢誠不易。對酒話當年。題柯敬仲畫梅花竹枝

死別丹丘老。于今二十年。似看顏色在。因有畫圖傳。庾嶺一枝雪。淇園數葉煙。令人春雨裏。相對泣嬋娟。韋德珪攜詩見訪。次韻以復。

儒冠自笑不封侯。猶向山中氣食牛。未見李邕思識面。若逢東野合低頭。新詩爛寫泥金紙。美酒深傾藥五舟。安得相逢王子晉。月明笙鶴過丹丘。

聽雨二絕

涼風颯颯下庭臬。落盡梧桐雨未消。只道□涼無著處。元來多半在芭蕉。生憎秋暑不肯退。入夜飛蚊猶更多。不是涼風吹雨急。終宵無復柰渠何。

秋興二絕

短檠照夢獨關情。七月江南尙甲兵。此夜書生愁裏聽。秋風秋雨盡軍聲。
草堂秋靜絕埃塵。日日門迎車馬賓。獨嘆庭中雙棗樹。今年無子惠比鄰。

和繆叔正見寄就柬秦文仲

八月新涼人袷衣。阿郎騎馬到門稀。山中有客論秋水。江上誰家歌采薇。野鶴步月作人立。木葉受風如鳥飛。寄訊勸書秦太史。木犀花開猶未歸。

次姜羽儀韻二首

落葉滿林啼亂鴉。不堪何處起哀笳。忽於半夜驚時序。又近中秋看月華。射石楚生空訝虎。縣弓廣客獨疑蛇。何時得似青門隱。十畝山田盡種瓜。

草堂八月暑微微。竹裏哦詩晝掩扉。過雨秋花如我瘦。未霜溪蟹爲人肥。長教肘後黃金印。不到山中白苧衣。正爾西風動愁思。又驚飢雁渡江飛。

鄭君舉府掾分幕西關次韻以寄

掾郎自愛西郊幽。大旗卓地臨清流。坐占柳陰臨晉帖。行穿花裏佩吳鉤。橫槊賦詩我所愛。擊柝抱關誰與儔。何當案牘假餘暇。同載玉山偉處遊。

次君舉西郊卽事

西枝之村不數里。扶醉與君清夜遊。三更落月照官舍。八月涼風吹客舟。蒹葭蒼蒼始受露。絡緯軋軋尙
專秋。冥戈在眼不肯退。安得置身同一丘。

蔡山人隱居

蔡家隱居絕蕭爽。鑿塹引水環幽深。當門十里荻花浦。繞屋一林斑竹陰。維艇正看黃葉落。開尊時對白
鷗斟。畏途別去罕得見。且醉西風傾素心。

題袁仲長仙史綠筠軒

仙家住。在篔簹谷。箇箇琅玕護石扉。委佩靜聞蒼雪落。梳頭閑看綠雲飛。月中王子吹笙過。林下壺公策
杖歸。若許迂疎逕相造。爲君攜取四弦揮。

題劉商觀奕圖

四老松根角兩棋。野人如鶴立多時。箇中便是商山樂。世上剛傳石室奇。一劫尙教遲黑子。千年何用刻
銀絲。老坡好事能題識。永配蘭亭玉枕碑。

題袁外史德潤堂

君子有令德。於焉潤其身。況彼學仙者。逍遙巖壑春。華宇構層阿。稽首延玉賓。綠窗生紫煙。珠樹散芳塵。
道藏五千卷。進業維日新。味玄葆冲和。養素全天真。願言崇靈澤。永永流後人。

計籌牡丹丘真人。以雜詩卷俾岳季堅。來草堂索詩。就次卷中甘允從三絕。

欲向丹丘借白雲。瑤壇稽首玉宸君。只愁俗眼無多女。不識琅函石室文。
聞道通玄似祖洲。羣仙於此盡遲留。剛風不到天根上。夜夜丹光五色流。
紫雲關下紫雲橫。瓊秀亭前璧月明。欲借芝田雙鶴子。來聽仙史醉吹笙。

題石魚爲牡丹丘真人賦

仙人有靈玉。渾然神鯉形。曾作大鯨吼。振鬣徙南溟。
靈壁石魚。元高侯彥敬得之。徑尺而鱗鬣口目具焉。侯遺南
谷杜真人。真人仙夫。爲月溪王真人持去。月溪羽化。復爲
歸之。

和荅呂養浩

搏虎南山膽氣雄。男兒壯志本來同。卻將短卷描蒲女。又把新詩寄敬中。
夜月浙江何日渡。秋風淮甸幾時通。要當挾策見天子。共看扶桑曉挂弓。

就次韻荅諸葛用中

鄠城遙識劍雌雄。自古相知博物同。向見袁安來舍下。始知諸葛隱隆中。
林泉竹里詩曾賦。舟楫桃源路可通。殺敵豈能無猛將。逢人莫問楚王宮。

中秋寓盤關適諸葛用中邾士林秦文仲龍門子英同會就留賞月分賦蓬字

中秋又在客邊逢。莫嘆流光轉斷蓬。老子固當清興發。故人相見好懷同。
酒涵大地山河影。身置廣寒宮闕中。明日更期維白舫。共扶殘醉倒詩筒。

題唐人牽馬圖

舞馬誰牽下木牀。絳纓初解玉丁當。梨園莫唱傾杯樂。錯把春風屬八坊。

題三生圖

三生石上舊因緣。也是山僧也是仙。記得分明都不說。從他月照葛洪川。

題相馬圖

神駿從來不受羈。僧中只有道林師。若教腳迹踏天下。後代何緣得馬兒。

君臣同慶樂送脫因萬戶

唐樂志君臣同慶樂一曲。貞觀中蘇定方執賀魯李勣平高麗。獻馘奏凱四曲之一也。其詞曰。主聖開昌歷。臣忠奉大猷。君看偃草後。便是太平秋。瑛三復是章。不勝撫膺。方今四野多壘。海波橫流。黎毗苦於誅求。國賦艱於餽運。而聖天子端居九重。累下寬詔。以慰元元之望。又選樞密院斷事官脫因公爲漕俟。以理海運。公盡勞王事。三年吳米畢達京邑。至正乙未春。賊起新豐。踰楓橋。抵閩關。將入城肆殺掠。公不以有司之事爲彼任。首決大議。率衆殺賊。以全吳城。豈非奉大猷爲聖天子佐昌歷者也。以公之才之忠。設聖天子命之誅羣惡。則太平之秋可待。瑛謹膏長短句。引其意使吳民歌以報公。公之恩德。固不在下士鄙語美之。然欲希公之聽。庶知婁東野人亦知公之萬一云。

盛哉世祖馬上開皇封。鍊馬蹴踏萬國空。奉琛獻璧被聖化。黑海之水直與銀河通。百年禮樂武備弛。生

民有眼不識戈與弓。邇來花山豎兒起微釐。延蔓長淮千里帕首多如蓬。巨鯨吞舟波浪白。落日壓山旗幟紅。城非不高官不守。所至赤子戢戢爲沙蟲。江南供需民力竭。家家喬木生秋風。兵興之際天子之憂在海運。所以遴官理漕御筆大書除我公。公才磊落固是匡贊具。況復讀書有志文武充。推心置人人亦樂爲用。不以細故芥蒂於其胸。三年東吳稻米抵都邑。丹旻一一標全功。今之人食君之祿不能爲君盡大節。臨難畏避憂冲冲。國之重事天下繫。豈可責分彼已不得竭效臣子忠。且如今年春盜賊起新豐。四更急撞關聚譟舉火攻。議者狐疑計莫出。公曰此賊已墮吾掌中。瞠目拔劍斫長案。有違令者當與此案同。議兵一千人袒臂如雲從。軍聲如雷震關出。橫鋌自主天前衝。日炙龍花上金甲。猩紅纓拂胡青驄。手挽強弓發猛矢。射殺西山雙白熊。野天秋高蒼翠健。凌兢狐兔無潛蹤。縛俘載馘振旅入城去。短簫奏凱擊鼓擊琴琴。城中居民比屋四十萬。長街廣巷羅拜父老婦女兒與童。咸言受活無以報。兩手加額願公五福全而崇。汲黯發粟漢廷實元老。毛遂歃血戰國推談宗。如公者總二子之才斷。豈非聖元國孕之所鍾。誰能排雲叫九重。有臣如此天子何不召入明光宮。大啓元戎十百乘。授以斧鉞出以誅羣凶。坐見功成舞干報天子。邦基式固河山雄。婁東野人拜手重稽首。期公致君堯舜勳業齊夔龍。謹歌君臣同慶樂。千秋萬歲永永傳無窮。

題雲山圖有感

樹密嵐光薄。山空雨氣酣。阿誰亭子上。對坐說江南。

題子昂畫楚江春曉

東方旭日出曠曠。照見巴江曲似弓。莫遣猿聲到巫峽。山頭猶有楚王宮。

雪姑吟。題朱澤民所□□姑鳥。

雲姑鸚鵡洲邊住。自小無心事機杼。一身悔嫁白頭翁。日日孤棲不知處。立傍溪頭楊柳枝。春風雅鼻欲相依。不聽杜鵑好言語。勸姑在外不如歸。姑不見韓朋樹上相思雀。雙宿雙歸雙飲啄。

天寶宮詞十二首。以寓所感。

天寶雞坊寵賈昌。不教蝴蝶上釵梁。錦裯晝浴天驕子。絳節朝看王大娘。芍藥金闌開內苑。蒲萄玉餼酌西涼。月支十萬資臙粉。獨有三姨素面妝。

五家第宅近天家。侍女都封繫臂紗。池上桃開銷恨樹。閣中香進助情花。風迴輦道鸞鈴遠。日射龍顏雉扇斜。韓虢並騎官廐馬。醉攙丞相踏堤沙。

蓮花池畔暑風涼。玉竹迴文寶篋光。貪倚畫屏巢翡翠。誤開金鎖放鴛鴦。輕綃披霧誇新浴。墮髻欹雲銜晚妝。笑指女牛私語處。長生殿下月中央。

五色卿雲護帝城。春風無處不關情。小花靜院偷吹籥。淡月閒房背合箏。鳳爪擘柑封鈿合。龍頭瀉酒下瑤罌。後宮學做金錢會。香水蘭盆浴化生。

龍旂孔雀擁鸞幢。步輦追隨幸曲江。鳥道正通天上路。羊車直到竹閒窗。桃花柳葉元無恨。燕子鶯兒各

有雙中貴向人言。近事風流陣裏帝先降。
祕閣香殘日影移。燈分青玉刻盤螭。琵琶鳳結紅文木。弦索蠶纏綠水絲。金屋有花頻賭酒。玉杵無子不
彈碁。傳宣趣發明馳使。南海今年進荔支。
近臣諧諛似枚臬。侍宴承恩得錦袍。扇賜方空描蛺蝶。局看雙陸賭櫻桃。翰林醉進清平調。光祿新呈玉
色醪。密奏君王好將息。昨朝馬上打圍勞。
虢國來朝不動塵。障泥一色繡麒麟。朱衣小隊高呵道。粉筆新圖徧寫真。寶雀玉蟬簪翠髻。銀鵝金鳳踏
文茵。一從羯鼓催春後。不信司花別有神。
十三女子擘箜篌。選作梨園第一流。卻道荷花真解語。豈知萱草本忘憂。紅鸞不照深宮命。翠鳳常看破
鏡羞。舞得太平并萬歲。五年誰賜錦纏頭。
五王馬上打毬歸。贏得宮花獻貴妃。樂起閣門邊奏少。禍因臺寺諫書稀。侍兒隨幸皆頰紫。骰子蒙恩亦
賜緋。姊妹相從習歌舞。何人能製柘黃衣。
新製霓裳按舞腰。笑他飛燕怕風飄。玉蠶倒臥蟠條脫。金鳳斜飛上步搖。雲母屏前齊奏樂。沈香火底竝
吹簫。只因野鹿銜花去。從此君王罷早朝。
宮衣窄窄小黃門。躑躅初開賜繚盆。夜月不窺鸚鵡家。春風每憶鳳凰園。愛收花露消心渴。怕解金珂見
爪痕。只有椒房老宮監。白頭一一話開元。

題姪良用臨趙魏公霜浦漁舟圖

曉霜靜落蘆花裏。漁父拏舟弄茗水。平岡雜樹淨無煙。夾浦亂山青似洗。翰林是時始歸老。最愛漚波亭子好。坐窗援筆寫江南。一段秋光落揮掃。不知傳世今幾年。百金酬直不棄捐。虎頭猶子亦癡絕。生紙一幅能模傳。前年之官去東浙。作贊殷勤云贈別。爲將老眼細摩挲。頭似唐人臨晉帖。咄咄八法皆逼真。獨於妙處難其神。蘭亭贖本永寶世。藏護不減囊中珍。今我不樂居溪上。客有龍門遠相訪。共披此卷遣閒情。眼底澄江動晴浪。嗟今南北皆干戈。清風日少紅塵多。磨穿鐵研不得志。拔劍斫地空高歌。何似長竿在吾手。多向船頭載新酒。寄謝故人顏太師。莫向煙波尋釣叟。

題韓熙載縱樂圖

文公避難肆荒淫。買妓朝朝散俸金。客有舒生能按節。如何不畫獨絃琴。

金粟影亭懷于彥成五十韻

八月玉山上。桂花千樹黃。或依松下石。多亞竹邊岡。葉帶寒煙重。陰連宿霧張。疎葩耐裏見。小蕊萼中藏。偃蹇當危檻。婆娑覆短牆。畫闌縣瘦影。金粟散幽香。皓魄穿虛幌。樛枝倚曲塘。臨流清可愛。著雨溼何妨。丹鷁排雲下。青鸞照鏡翔。薰衣欺甲煎。點額妬宮妝。得子元無種。移根自有方。雖然亭側畔。宛在水中央。徙倚成吟久。攀援引興長。未能招隱士。先約探花郎。仙掌杯承露。君門策擅場。虎頭傳綵筆。鳳背按霓裳。色映鵝兒酒。名高荔子漿。贈詩誇竇氏。運斧笑吳剛。鼻觀聞山谷。神遊狎上皇。蕊珠仙子降。瑤玉佩聲鏘。

非獨延秋色。尤兼耿夜光。素蟾殮玉屑。白兔搗玄霜。既入維摩室。寧無般若湯。喜逢越清澈。愁憶賀知章。岳亦居盤谷。陸今留太倉。雖謀茲夕醉。卻想昔年狂。夜月華堂裏。秋風錦瑟傍。曾於青步障。呼下踏謠娘。按曲歌桃扇。圍棋勝紫囊。芙蓉連蒂萼。橘子並頭嘗。弋鳥驚逢鶯。罾魚喜得魴。娉婷行鑿落。弦索奏鴛鴦。翠袖擎燈燭。銀鉤寫樂章。闊談矜漢語。嫚罵據胡牀。屢舞袁千里。聯詩顧辟疆。至今猶想像。此際謂尋常。俯仰經三載。干戈滿四荒。名慚徵士起。職愧守關忙。接境無雞犬。當途正虎狼。何期雲出岫。竟逐雁隨陽。世事憐多變。人情慨可傷。睽違誠草草。音問太茫茫。去日應愁暑。今朝已喜涼。轉頭成久別。矯首獨相望。越上秋方好。巖頭樹亦芳。猶聞留鑑曲。未報渡錢唐。晞髮當天姥。題詩寄草堂。身棲衆香國。夢遶百花莊。適意多行樂。歸期久想忘。灑西亭子好。幾日促輕裝。

至正乙未十月廿六日讀書舍會合聯句。

王歷十五載。陽月廿六夜。嚴節增淒厲。顧暮曷易摧。謝宿莽委中園。衰驚焱納虛榭。集鳳萃時彥。恢鳴騶駐華駕。襟分念契闊。盧簪盍樂休。假緗錦詩在囊。顧籤軸書紬架。啜吭宵警清。袁宿羽風聲乍。霜階殞葉積。恢露石弦花。亞明星光粲。燈盧溜雨寒。落醪喚婦給膳庖。顧命童肅迎。迂破橘香在枝。袁罾魚水回汜。膾飛雪縷盤。恢酒灑霞流。擘奏馮牙拍節。盧樂度冰絲。借吳風語柔麗。顧楚雲秀嬌。姹春喉弄鳴鶯。袁塵韞舞飛鷗。炭呀朱火獸。恢香斂博山麝。煮茶龍頭鑪。盧噉肉牛心炙。甲銛房剖栗。顧吻渴漿沃蔗。韞時歎合并。袁深情勞尉藉。憂葵終念魯。恢逐鹿張爭伯。羣妖樹白槎。盧黔首帕紅鬢。流馬曉渡瀘。顧細柳夜屯。

灞。一戈魯陽揮。袁三箭天山射。跳躍突精騎。恢彎□陸強弋。斬馘刃刳羊。盧毆毒火焚蠹。威聲淮蔡功。顧佳氣春陵暗。降納慎撫綏。袁遠傲毋貸赦。獻凱捷書旋。恢班師令旂。銘鼎會勒勳。盧賜金那吝。色絲組雲展。顧鍊石補天罅。事國宜盡瘁。袁奮身不遑暇。終朝帝業隆。恢喜見綸言下。苗格階舞干。盧夷貢布輸幃。明時歌再康。顧此日酒頻賁。詩弭序毛齒。袁腸令笑機。攬酌酊玉山頰。恢傾倒縣河瀉。行嗟阮藉途。盧耕學樊遲稼。聯次石鼎句。顧咏紀讀書舍。雪繭筆絢花。袁銅盤燭燒樺。駒隙恣窮險。恢蟲聚散炎夏。願得解甲兵。盧庶以事桑柘。永齊白首民。顧擊壤頌元化。顧

至正乙未十月廿九日。玉山中玉毬花開。飲酒花下。時琴川妓秀雲在焉。

十月兵戈未冝休。爲將淥酒滌煩憂。美人笑解金條脫。獨樹花開玉繡毬。冷豔尙含春雨露。閒情猶帶舊風流。喚回蝴蝶團香夢。睡隔梧桐落葉秋。化力豈教司后□。樂聲底用打涼州。廚中儘有逡巡酒。勝賞何妨日日留。

寄張彥弘進士。

聞道風流張聘君。俊才絕似鮑參軍。玉壺滿貯三危露。丹鳳高竊五彩雲。笑倚月中金粟樹。醉招花下石榴裙。幾時同下秦迂榻。剪燭聯詩坐夜分。

送韋伯圭教諭富陽

古城玄聖宅。正在富陽山水落。魚梁出峯迴。鳥道環先生施教去。弟子讀書還。應過嚴陵廟。看碑拂蘚斑。

漫成

未知曾解太平圍。獨嘆時光在眼非。黑海水寒魚到少。玉關風急雁來稀。軍中盡說廉頗老。□裏新傳趙孝肥。愁見嚴霜落紅葉。行人何處寄征衣。

送王叔正贅親

新婚王郎實我弟。閱閱世家金葉儒。種玉求妻知雍伯。乘龍作壻見淳于。兔絲女蘿附脩竹。翠鸞青鳥集高梧。何以贈之九子墨。更祝少君勤事姑。

乙未冬至口號

乙未南至節候好。晴日暖風如早春。既占雲物卜來歲。及見梅花喜似人。寒溫敍語拜孫子。綵服稱觴娛老親。只憐舍弟不在眼。更憶大郎鏖戰塵。

安別駕殺賊紀實歌

至正十五年冬十一月廿六日。崑山之石浦村。有賊黨殺土豪胡氏父子及孫。火其屋。掠其妻女財物。巢千村之無相寺。將有助逆之意。州尹于闐彥暉公。外示以安。至次月廿三日。假以他事。詣訴于郡。郡官聞于分省參政公。以本郡治中安公。行勦伐事。公卽率親隨精兵快馬。聲言發常熟。乃銜枚夜至真義里。分符俾瑛與陳志學。各選水軍。協力勦捕。時廿四日夜。廿五日早過江。令集千墩寺。寺之去無相寺廿里。州尹率水軍自此西進。義士張漢傑奇領各募義丁。分把去路。治中公自江北浮馬直入賊巢。

擒賊焚寺。全軍而回。是夜已半。此行也。計官軍五百。水軍六百。民之袒肩者千有二百人。往返者再宿。生擒首賊二十有六。殺死焚死者無算。脅從者貸之。得米若干石。銀若干錠。他物稱是。實用兵神速之力也。瑛忝從軍幕中。謹歌長歌一章。以紀其事。且美治中公。能奮勇傲忠報國也。歌曰。

君不聞趙雲開關下長坂。蜀主謂之一身膽。又不聞李廣衝敵勇冠羣。虜中號曰飛將軍。二千年間幾人亞。復見西河安別駕。別駕今年二十六。燕額虎頭目如畫。春來殺賊西閭關。手中寶刀龍爵環。胯下一正雪色馬。滿身血濺桃花斑。吳淞江南歲將暮。有賊殺人團黨聚。心期絳帕接刀兵。日費黃金置旗鼓。州尹慮久除剪難。中藏長策外示安。曉張大榜諭渠首。夜裏飛章聞郡官。別駕因之白參政。授以兵符口傳令。帳前五百繡衣人。疾走銜枚涉泥濘。草堂擊柝報二更。軍吏扣門提水兵。揀精揮勇得三百。戈船踏槽隨潮行。遲明下令于墩集。最喜打頭風雨急。二十四馬渡長江。直擣賊巢擒賊出。手擎步挾馬上馱。髯胡擊笛烏鳥歌。歸來火光燭天地。卸甲共傾金叵羅。鉦鼓遙遙入城去。父老歡迎滿途路。具慶堂中散賜金。父候兒歸兒拜父。百年一門絕代無。父領太尉兼大夫。眼前有子乃如此。將相雙全忠孝俱。今年大家盡無米。小家嗷嗷食糠粃。水田百里生白波。蔓草不除春不已。經濟正在艱難時。花卿姓名齟齬知。勿謂一身自年少。繫此大郡之安危。兵家行兵貴料敵。重地無人戒深入。王翦伐荆六十萬。司馬擒孟纜八日。西河別駕真英材。貂蟬定向兜鍪來。一心成功報天子。天子已築高高臺。書生從軍居幕下。粉面聊爲萬一謝。作歌更紀殺賊時。乙未季冬廿五夜。

岳季堅自計籌來。飲于雪巢。口占二絕。

江上北風初厲寒。雪巢賓客話團圓。花開一箇枇杷樹。鎮日持盃做雪看。
江上北風未成冷。雪巢無雪奈冬何。老子若來遲半月。定看雪似去年多。

次王仲立歲夜見寄口號

澤國江空歲晏天。人家雪沒斷炊煙。田田白水深三尺。未卜新年勝舊年。

寄城南彈箏美人

袅袅婷婷十五時。雙鬟低躲綠雲垂。桃花貪結春風子。錯恨當年杜牧之。
銀甲彈箏玳瑁筵。新聲翻在十三弦。綵雲忽逐梨雲去。夢隔梅花月子圓。
曾將螺子染金篋。爲補春山八字眉。最是橫波流太急。不容舟楫渡江遲。
雪作肌膚玉作神。黃金幾欲買青春。只因變卻龜兒卦。到底東風錯嫁人。

送韋道寧閩憲奏差

閩中第一東南會。海市環山聚舶商。五月炎風開茉莉。三州瘴雨溼檳榔。行人日日隨驄馬。悍吏時時避繡裳。見說石門堪隱世。羽書不到止戈堂。

送姚以善陞浙東帥闡

漕府服勞陞帥闡。臨歧送別更題詩。兵戈尙爾連千里。鞍馬毋煩事四馳。城上風高聽刁斗。海邊日出見

旌旗虎頭猶子如相見。說我于今老更癡。

題趙子昂畫琅玕竹

我有一疋撫州紙。愛之不減鵝溪絹。學士放筆作直幹。此君如玉多清標。梁王宅裏月皎皎。山簡池上秋蕭蕭。腸斷江南鐵鉤鎖。鳳鳥不來今寂寥。

題春□勝遊圖

憶昔醉看天平山。龍門日灸春爛斑。茶煮白雲亭子閒。頻年甲兵蔓南北。未卜此身能再閑。

送周天蟾

天蟾子布衣儒。家在金陵市上居。年方十五習孫吳。二十作賦擬三都。揣摩讀成不下蘇。猿臂豹頭七尺軀。膂力絕人世所無。擊劍慣騎生馬駒。結客況結專設諸。手提鐵杖歷方輿。道逢異人毛莫如。口噉皇極玄玄書。摩盪動靜皆潛虛。豁然一悟忠義俱。不向侯門曳長裾。誓與天子守皇都。至正壬辰秋月初。紅巾寇杭數萬餘。斬關據嶺袒臂呼。大參董侯奉虎符。延君幕下參軍謨。布以長陳緣平途。乃張左翼伏石胙。君居中軍三擊桴。黃旗赤幟紛前驅。傾巢擣穴擒其俘。徑歸田里耕而鋤。浙垣校功奏王除。不日弓旌駟馬車。皇皇使者來草廬。水軍開府東海隅。大帥待君猶鳳雛。江左未必無夷吾。試君新繖水戰圖。丈夫抱才不設據。徒令後世空嗟吁。春江花開當酒壚。壚頭酒價如珍珠。爲君豈惜滿眼酤。手折楊柳歌吳歛。作詩送君語非諛。不信問之秦太迂。

去年秋九月。天蟾先生過余草堂。偶談及水軍事。余謂水戰之法甚難。蓋舟楫有遲速。風水有逆順。故不能齊其隊伍。先生自言。近以八陣圖法。翻製水戰陣圖。一十有八。予以兒輩長千夫。領寧海所事。或有所用。求之未獲。示誨。今先生以大帥之招。復至海上。聞下榻泮宮。遂往見之。而先生又御風西遊矣。陳性之訓導。出贈行冊。求予詩。其出處隱顯。文仲秦先生已序之。予復何言。重違其意。爲長歌一章。以歌之。文仲性嗜書。有書迂。婁江人稱爲太迂。先生云。今年實至正乙未。后正月十日。玉山顧瑛謹識。